



C40  
4514  
27



0 1 2 3 4 5 6 7 8 9 200 1 2 3 4 5 6 7 8 9 210

C40-4614

了翁上座請大藏及百家書置武州紫雲山  
我微笑塔院庭中永為學者不敢許出陝內  
當山二世鐵牛機謹誌



B 64853

大寶積經卷第八十六

唐三藏法師菩提流志奉詔譯

大神變會第二十二之一

如是我聞一時佛在舍衛國祇樹給孤獨園與大比丘衆千二百五十人俱菩薩摩訶薩八千人文殊師利與商主天子俱在會中爾時商主天子白佛言世尊如來常以幾種神變調伏衆生佛告天子我以三種神變調伏衆生一者說法二者教誡三者神通云何名爲說法神變所謂如來無礙大智見未來世一切衆生心行差別於三寶所有信不信及業果報皆

1 2 3 4 5 6 7 8 9 10 11 12 13 14 15 16 17 18 19 20

悉了知如佛所說若現在世所行惡因當墮惡趣隨業受報決定無差若彼衆生善業因緣誓願力故從惡趣出生人天中或以聲聞辟支佛乘及以大乘而得解脫經爾所劫受苦受樂當得涅槃當得值遇若干諸佛如是等業決定無差若彼衆生善業因緣誓願力故當生欲界色界無色界經爾所劫以如是乘而得解脫以如是行當得見佛承事供養如是一切上中下品善不善業乃至一念如來悉知而爲說法是名說法神變云何名爲教誠神變若如是教諸持戒者是應作是不應作是應信是不應信是應親近是不應親近是法雜染是法清淨乃至攝受一切功德善道資糧行如是道得聲聞乘辟支佛乘行如是道成就大乘非法應離如法應住如佛所敎決定無差是地獄業是傍生業是餓鬼業是人天業不善應捨善法應修此是聖道應如是學此等衆生人天往返漸入涅槃如是示教終不空過是名教誠神變云何名爲神通神變若爲調伏惱慢衆生或現一身而作多身或現多身而作一身山崖牆壁出入無礙身上出火身下出水身下出火身上出水入地如水履水如地日月威德以手捲摩或現大身至於梵世乃

1 2 3 4 5 6 7 8 9 200 1 2 3 4 5 6 7 8 9 201

至廣大徧覆三千大千世界隨所應現調伏衆生是  
名神通神變爾時商主天子白佛言世尊頗有神變  
能過此耶佛告天子如來復有殊勝神變卽語文殊  
師利汝可演說令諸菩薩得深法忍摧伏衆魔亦令  
如來菩提之法久住於世文殊師利白佛言世尊如  
來若以三千世界四大海水置於掌中水性衆生無  
所娆動如是神變未爲殊勝若如來於一切法不可  
言說無名無相無色無聲無行無作無文字無戲論  
無表示離心意識一切語言道斷寂靜照明而以文  
字語言分別顯示一切世間所不能解沙門婆羅門

彼時幻師唯見佛身餘無所見歡喜踊躍而便獲於  
念佛三昧從三昧起合掌向佛而說偈言

我昔於闍浮 幻化無過上 今比佛神通  
無能及少分 由是方了知 諸佛難思力  
隨心能變現 化佛如恒沙 所見諸如來  
皆具於相好 願尊爲顯示 何者是真佛  
於此諸如來 我欲修供養 願尊爲我說  
何者爲勝果 若人於佛所 不生尊重心  
如是諸凡夫 退失於安樂 今於世尊前  
發露先所犯 妄試如來罪 永願滅無餘

1 2 3 4 5 6 7 8 9 201 1 2 3 4 5 6 7 8 9 201

梵釋并大衆 願皆證知我 爲度諸群生  
今發菩提心 以智慧光明 覺悟於世間  
施與甘露法 悉皆令充滿 若人於佛所  
見如是神變 及聞悅意言 勝行無礙智  
何有明慧者 不發菩提心 願示菩提道  
及徧清淨行 何等爲修行 二乘不能入  
云何所行處 尊重而供養 云何具威儀  
及離諸疑悔 云何於多聞 無厭修堅實  
云何爲人說 令樂於正法 無希利養心  
及善知恩報 云何於衆生 常爲不壞友  
云何近善友 捨離惡知識 云何值諸佛  
供養心無倦 云何爲學處 尊重及清淨  
云何定種性 成就如理心 及捨不如理  
具足正思惟 云何無怯弱 不爲魔所攝  
思惟於義理 不捨諸衆生 云何不應捨  
不取而攝取 得入於正行 具足善方便  
云何修慈悲 成就諸神通 證於無礙辯  
及得陀羅尼 云何獲法忍 清淨之辯才  
當捨應捨法 得入甚深義 云何於誓願  
一切皆圓滿 於諸波羅蜜 而得不退轉

我於如是法 當願勤修行 惟願大悲尊  
爲我廣宣說

爾時世尊以偈答曰

若了一切法 皆同於幻化 是人則能現  
百億諸佛身 往於俱胝刹 度脫諸衆生  
譬如跋陀羅 無色現衆色 不生亦不滅  
無住無去來 世尊變化身 及與比丘衆  
亦無有生滅 乃至於涅槃 此皆是如來  
不思議神變 亦如幻化者 現象馬軍陣  
迷惑諸衆生 妥見爲真實 如是象馬軍

聞者驚怖是名諸佛最大神變復次如來若以三千  
大千世界內於口中於四天下無所障礙日月光明  
亦不隱蔽如本而住其中衆生亦不覺知往來方所  
世尊如是神變未爲殊勝若如來於一切法不可說  
無文字無名相乃至離心意識一切語言道斷寂靜  
照明而以文字語言宣說顯示是名諸佛最大神變  
復次如來不共之身神通力故隨諸衆生種種示現  
悉令歡喜如是神變未爲殊勝所謂如來大神變者  
無我說我無衆生說衆生無人說人無養育說養育  
無名說名無色說色無受想行識說受想行識無處

1 2 3 4 5 6 7 8 9 20 1 2 3 4 5 6 7 8 9 20

說處無界說界雖說眼空眼不言空雖說色空色不言空說眼識空識不言空乃至意空及以法空意識空等亦復如是說如是等無名無相無動無知無言之法摧滅一切生滅之相是則如來最大神變如是神變不與眼相應不與色相應不與眼識相應不與耳聲耳識鼻香鼻識舌味舌識身觸身識意法意識相應如是神變不與身合不與心合無行無作離諸境界一切世間所不能信何以故言世間者名爲五蘊凡夫於此妄生執著或說蘊常或說無常以是義故一切世間妄見蘊常聞說無常不能生信妄見蘊樂聞說蘊苦不能生信妄見蘊我聞說無我不能生信妄見蘊淨聞說不淨不能生信計蘊我所說無我所不能生信計五蘊實聞說不實不能生信以是義故如來神變出過心相聞者不欣一切世間所不能信復次超眼境界非色法故是名神變超耳境界非聲法故乃至超意境界非意法故不可顯示非智所知是名神變復次空無相願不可言說而說於空無相無願是名神變無起無作無性無相無生無滅本來涅槃不可言說而說涅槃是名神變復次布施清淨三輪故是名神變何等爲三謂離我相及衆生相

1 2 3 4 5 6 7 8 9 10

不念菩提持戒清淨是名神變所謂身口意業無所作故忍辱清淨是名神變剎那壞滅無所著故精進清淨是名神變無去無來身心不動故禪定清淨是名神變心無所依內外寂靜故智慧清淨是名神變照明諸法滅一切見故復次法無出相說出離法是名神變法無差別文字分別是名神變法無所行說有修行是名神變法無來去說有來去是名神變於一道證建立諸果是名神變於一味法分別三乘是名神變一切諸佛唯是一佛說無量佛是名神變一切佛土唯一佛土說無量土是名神變無量衆生卽一衆生說無量衆生是名神變一切佛法唯一佛法說無量法是名神變法不可示顯示諸法是名神變法無所得修習作證是名神變爾時商主天子白文殊師利言如我所解仁所說義於一切法所有言說悉名神變文殊師利言如是如是一切言說實無所說名大神變說是法時一萬二千天子發阿耨多羅三藐三菩提心五百菩薩得無生法忍爾時長老舍利弗語商主天子言汝聞此神變不驚怖耶天子答言我卽神變云何驚怖舍利弗言天子以何密意而作是言天子曰一切諸法若善不善無動而動名大神

變是故舍利弗作善業者生於天上有大威德如是  
善業不可思議一切衆生往來生死亦不可思議不  
可思議者名大神變如佛所說四種境界不可思議  
一者業境界不可思議二者龍境界不可思議三者  
禪境界不可思議四者佛境界不可思議以是義故  
說一切法名大神變不應驚怖復次舍利弗若如來  
說此神變虛空界寧有怖耶答言不也天曰若虛空  
不怖云何問言汝不驚怖舍利弗言汝豈同虛空耶  
天曰如佛所說若內空外空是虛空不答言如是天  
曰是故一切衆生是虛空性舍利弗言天子如汝所  
說不久亦當現此神變何以故超過一切境界是大  
神變故爾時舍利弗白佛言世尊此商主天子往昔  
供養諸佛世尊及文殊師利乃能成就如是辯才佛  
告舍利弗如是如是如汝所說是文殊師利之所成  
熟舍利弗乃往古世過無量劫有佛名等須彌如來  
應供正徧知明行足善逝世間解無上士調御丈夫  
天人師佛世尊出現於世國名安樂劫名歡喜舍利  
弗彼佛世界一切衆生具足安樂乃至無有少苦惱  
聲彼佛國土四寶所成金銀瑠璃及以頗梨地平如  
掌清淨柔軟如天妙衣無諸難處天人充滿安隱熾

盛快樂無量是故名爲安樂世界彼佛法中純是菩薩精進勇猛智慧光明得修多羅王陀羅尼辯才無盡善巧方便分別說法神通智慧摧破魔怨解脫無礙成就定忍善知根性應病與藥具大福德智慧資糧爲諸衆生不請之友以神通力徧遊佛刹入智行海安住施戒智慧多聞無邊善根方便廻向住於十力四無所畏一切佛法遊戲三昧諸禪解脫彼佛世尊以如是等諸大菩薩而爲眷屬於彼世界有轉輪王名淨莊嚴正法化世王四天下七寶具足王有千子悉發阿耨多羅三藐三菩提心淨莊嚴王及其後宮亦皆已發阿耨多羅三藐三菩提心彼等須彌如來壽七十俱胝歲爾時淨莊嚴王於百千歲中承事供養彼佛如來及菩薩衆衣服飲食一切樂具王與千子及其後宮得清淨信愛法懽喜更無異心常於佛前手自供養親近聽法過百千歲已時王千子及以內宮獲得四念何者爲四一者念佛菩薩二者念施三者念戒四者不忘菩提之心得此念故若晝若夜常得見佛及諸菩薩後於一時淨莊嚴王及其眷屬爲聽法故往至佛所時彼如來爲欲教化諸菩薩故於大衆中現種種神變爾時淨莊嚴王前白佛言

1 2 3 4 5 6 7 8 9 201 1 2 3 4 5 6 7 8 9 201

世尊頗有神變能過此耶佛告大王如來復有殊勝  
 神變所謂了知過去已滅現在不住未來未生無心  
 心所而說三世心心所法於一味中說三解脫於一  
 滅證說四聖諦開示諸法空無相願成就顛倒苦惱  
 衆生說無相無爲成就菩提於不取不捨說檀波羅  
 蜜於無住無作說尸波羅蜜於無我法說羼提波羅  
 蜜身心寂靜說毗離耶波羅蜜不亂不攝說禪波羅  
 蜜離彼此岸說般若波羅蜜無所動念而行方便離  
 依怙相修習於慈以無作法修習於悲以離欣悅而  
 修於喜以不住法而修於捨以無所見起於天眼無  
 所聞故起於天耳無所攀緣起他心智離於前際起  
 宿命智身心不動起於神足不住心法修於念處以  
 無生滅修四正勤非根說根非力說力諸法寂靜說  
 菩提分法無差別修八聖道不住寂靜修奢摩他遠  
 離法相修毗鉢舍那本來寂滅而說涅槃彼佛世尊  
 爲淨莊嚴王千子眷屬說此神變法時八萬四千衆  
 生發阿耨多羅三藐三菩提心淨莊嚴王及以千子  
 證於法忍以佛神力卽於佛前以偈讚曰

如須彌山 映于大海 破一切闇  
 蔽諸大眾 如日初出

世尊毫相 德照佛刹 如月圓滿  
光明熾盛 佛德圓滿 慧光普照  
譬如蓮華 不著於水 佛處子世  
無所染著 如師子王 吼於林野  
人中師子 吼於性空 說一切法  
非有非無 令離邊見 說一切法  
於一切相 若生若滅 說無生滅  
名師子吼 分別此岸 或示彼岸  
不住諸法 名師子吼 分別二相  
是染是淨 諸法性淨 名師子吼  
貪瞋癡行 從分別生 不起分別  
名師子吼 說生死法 無常無我  
從顛倒起 名師子吼 生死涅槃  
本來寂靜 是大菩提 名師子吼  
諸見所縛 流轉世間 開示性空  
名師子吼 如來導師 所現神變  
悉能開示 名師子吼  
於一切違順 其心不傾動 常住於平等  
名隨順法忍 隨順佛所說 甚深寂靜法  
亦不於中證 名隨順法忍 遠離諸過惡

1 2 3 4 5 6 7 8 9 200 1 2 3 4 5 6 7 8 9 201

增長於善法 於中無所著 名隨順法忍  
 說諸法空聲 及一切見聲 二俱無所著  
 名隨順法忍 無邊佛法聲 種種煩惱聲  
 不起聲分別 名隨順法忍 於施戒多聞  
 精進及定慧 如法而修行 名隨順法忍  
 不捨菩提心 平等觀一切 清淨菩提道  
 名隨順法忍 如來自意語 開示諸佛法  
 於此無疑惑 名隨順法忍 若我證菩提  
 當大師子吼 演說此神變 如今佛所說  
 我於不思議 無上大福田 已植於種子

終無有退轉 假令大地壞 大海悉枯竭  
 我所種善根 永無有退失 了知衆生心  
 其性如虛空 深植菩提種 得無邊福德  
 如我今志樂 唯佛能證知 天人乾闥婆  
 無有能知者 我今終不求 諸天勝妙報  
 我當得智慧 如佛人中尊 我於百千歲  
 親近供養佛 發趣菩提故 修此無邊業  
 我今與千子 及後宮眷屬 莫常供養佛  
 爲成熟菩提 我今得善利 善見於諸佛  
 善得聞此法 愛樂於菩提 若愛樂菩提

則爲愛樂法 憐愍衆生故 不捨於佛乘  
爾時衆中有菩薩名法速疾語淨莊嚴王言大王汝  
不隨順如來神變亦非發趣無上菩提何以故大王  
菩提者住於法界不來不去無知無行非色非相不  
取不捨如畫虛空無所觸礙本性清淨大王菩提者  
入一切處諸法平等故菩提無分別離諸相故菩提  
寂靜止息相故菩提性淨離計著故菩提不動無襍  
亂故大王菩提者名心平等無所起故菩提者名衆  
生平等本無生故菩提者名不生生因緣無性故菩  
提者不可顯示離心意識故大王菩提無所行過諸  
境界故菩提無戲論離尋思相故菩提爲空性相空  
故菩提無相離一切相故菩提無願無所住故菩提  
無作無業報故菩提無爲離三相故大王菩提者性  
相如是若於此法有所願求徒自疲勞何以故如菩  
提性菩薩應行能如是行名爲正行爾時淨莊嚴王  
白法速疾菩薩言願爲我說菩薩正行法速疾言大  
王捨諸所有是菩薩行衆生平等無分別故頭陀學  
戒是菩薩行戒性平等無所行故離瞋恚是菩薩  
行忍性平等無心相故堅固勇猛是菩薩行精進平  
等離心行故三昧解脫是菩薩行禪定平等無所緣

1 2 3 4 5 6 7 8 9 10

1 2 3 4 5 6 7 8 9 10

故聞慧資糧是菩薩行慧性平等無所念故生於梵  
住是菩薩行染淨平等二俱離故起諸神通是菩薩  
行神通平等不生念故具足辯才是菩薩行法義平  
等離心相故成就勝解是菩薩行法界平等無所動  
故修七覺分是菩薩行觀照平等不懈怠故起四攝  
法是菩薩行諸法平等同其事故等心衆生是菩薩  
行心性平等無分別故莊嚴佛土是菩薩行清淨平  
等如虛空故三十二相是菩薩行觀法無相入平等  
故淨身口意是菩薩行離於三業性平等故隨喜衆  
生是菩薩行一切衆生等無我故不貳生死是菩薩  
行了知如夢性平等故常修善業是菩薩行知業平  
等無業報故堅固修行是菩薩行觀一切法如幻化  
故安忍衆苦是菩薩行了知平等苦不生故親近善  
友是菩薩行於友非友心平等故勤修深心是菩薩  
行果報平等無所求故多聞無狀是菩薩行說法聽  
法俱平等故不憚惱法是菩薩行平等說法不希求  
故攝受正法是菩薩行平等成熟諸佛法故常求實  
智是菩薩行第一義諦性平等故謙下其心是菩薩  
行等心謙下諸衆生故普攝一切諸善功德是菩薩  
行功德平等無所念故爾時淨莊嚴王聞說如是諸

菩薩行歡喜踊躍生愛樂心卽脫衣服嚴身之具與法速疾菩薩時王千子亦各脫身莊嚴之具用上菩薩作如是言願令一切衆生成菩薩行得是辯才我等今者快得善利得見如是真善知識恭敬供養爾時法速疾菩薩告淨莊嚴王汝所供養甚爲下劣當知復有殊勝供養時法速疾菩薩以偈頌曰

大千界衆生 皆發趣菩提 假今盡一劫  
男女以奉施 若人發道意 以信而出家  
隨佛而修學 其福勝於彼 過去未來世  
一切諸如來 無有不捨家 得成無上道

三世一切佛 稱讚出家法 若樂供養佛  
當依佛出家 設滿恒沙界 珍寶供養佛  
不如一日中 出家修寂靜 彼則近菩提  
摧破魔軍衆 出家不放逸 白法恒增長  
不壞衆善根 遠離諸煩惱 捨於家業累  
順道聖所讚 捨家離惱縛 除惱離魔縛  
心解行無染 不久證菩提

爾時淨莊嚴王聞此偈已於自在王位一切愛欲皆悉捨離卽白佛言世尊我願於佛善法律中出家受戒時等須彌如來告言大王出家無患我常勸讚樂

著居家非我所許汝於王位猶有愛著我當教汝如  
法而住爾時淨莊嚴王告千子言汝等誰能紹繼王  
業諸子咸言我等亦樂出家願垂聽許父王告言汝  
等若悉出家此四天下國土人民誰當養育若汝等  
大悲堅固應爲作王普令衆生安住善法時千子中  
有一王子名念大悲卽以偈頌答父王言

父王於佛法 所得諸功德 我悲受王位  
亦當如是學 我常修梵行 盡形持八戒  
我當不飲酒 不塗飾香華 身去莊嚴具  
不卧金牀座 足不躡金屣 首不飾寶冠

不著天妙衣 不觀諸妓樂 不覩奇鳥獸  
不從宮女人 周巡四天下 宣行十善道

訶責家過患 讚歎出家法 捨自在憍慢  
親近佛法僧 不退菩提心 常厭於三界

以施愛利益 同事攝衆生 普令於大乘  
悉當得成熟 畫夜六時分 當往於佛所  
爲聽聞法故 供養彼如來

爾時等須彌如來讚念大悲王子言善哉善哉善男  
子汝見平等法故住於大悲出家正信於在家菩薩  
最爲殊勝與出家功德等無有異爾時淨莊嚴王卽

1 2 3 4 5 6 7 8 9 200 1 2 3 4 5 6 7 8 9 200

立念大悲紹於王位與九百九十九王子從佛出家  
 既出家已等須彌如來爲說如是神變之法於後不  
 久獲五神通得念總持多聞智慧時念大悲於十五  
 日受灌頂位亦以是法爲四天下一切衆生宣示教  
 化九十二俱胝衆生發阿耨多羅三藐三菩提心悉  
 於等須彌如來法中出家修道住於大乘得不退轉  
 舍利弗汝觀是法無量功德成熟一切善根衆生舍  
 利弗彼淨莊嚴王者豈異人乎今商主天子是也法  
 速疾菩薩者今文殊師利是也彼千子者此賢劫中  
 千佛是也念大悲王子者我身是也舍利弗是諸菩  
 薩深心正行不放逸故得阿耨多羅三藐三菩提證  
 此往昔修行法時三萬二千天人發阿耨多羅三藐  
 三菩提心爾時舍利弗語文殊師利言仁與商主天  
 子久修梵行多供養佛種諸善根文殊師利言大德  
 夫梵行者名八聖道是有爲法我卽無爲是故我不  
 久修梵行夫梵行者名有所行我無所行是故我不  
 久修梵行又梵行者名滅煩惱我無煩惱亦無所滅  
 是故我不久修梵行馳騁五欲說於梵行我於五欲  
 本無所行是故我不久修梵行超過魔道名爲梵行

1 2 3 4 5 6 7 8 9 201 1 2 3 4 5 6 7 8 9 201

我當安住諸魔道中是故我不久修梵行成就善法  
 名爲梵行我於善惡都無所得是故我不久修梵行  
 聲聞緣覺所住正位名爲梵行我無所證是故我不  
 久修梵行修涅槃道名爲梵行我於涅槃無所願求  
 是故我不久修梵行復次舍利子汝所說我多供養  
 佛汝謂如來可供養耶所以者何如來非色亦不可  
 見云何而得供養如來如來非受息一切受如來非  
 想離一切結如來非行畢竟無作如來非識出過心  
 意云何可得供養如來復次如來行於性空非眼色  
 界住無相際非耳聲界離於二相非鼻香界無可知  
 相非舌味界無障礙相非身觸界入於平等非意法  
 界云何可得供養如來又如來者名爲法界名曰如  
 如入於實際住於大空不動本性斷諸戲論無所攀  
 緣不住於識不依三界亦不住於今世後世常寂極  
 寂離身口意無形無相無毀無譽無漏無失猶如虛  
 空徧一切處云何可得供養如來復次舍利弗如汝  
 所說種諸善根此善根者非身見根非貪瞋根非顛  
 倒根非五蘊六入七識住根非八邪九惱十不善根  
 彼善根者非戒學根非心學根非慧學根非正趣道  
 根非明解脫根非四諦六通根非九次第定十無學

1 2 3 4 5 6 7 8 9 10 11 12 13 14 15 16 17 18 19 20

根非五根五力七菩提分八聖道根又善根者非結使根非障礙根非惡作根非生滅見根非斷常見根非我見人見衆生見壽者見根非蘊魔煩惱魔死魔天魔根彼善根者非妄念根非無明根非行識名色六入觸受愛取有生老死憂惱根彼善根者非欲界色界無色界根非布施持戒忍辱精進禪定智慧根非慈悲喜捨根非聲聞緣覺所證之根菩薩善根者所謂心無所住一切智根無自作他作根忍辱調伏根莊嚴身口意根大慈大悲根成熟一切衆生根攝受一切法根成熟一切佛法根不斷三寶種根捨一切所有不求果報根積集衆善不求釋梵根發大精進不樂小乘根修習禪定不味著根以無所捨行智慧根徧入諸行修方便根具足十力四無畏根得陀羅尼無礙辯根獲神通力淨佛土根趣菩提樹轉法輪根時文殊師利說此三種決定義已一切大衆咸稱善哉以種種花散於世尊及文殊師利上作如是言若佛刹中無文殊師利佛不出世非文殊師利不能成熟一切衆生廣大善根若有得聞文殊師利所說法門不驚不怖遠離一切魔業障礙於此大乘得清淨光明

0123456789

200

# 大寶積經卷第八十六

音釋

摶摩

摶音門摶摩謂

燒

爾沼切擾

羼提

梵語也此同亂也

云忍辱羼

初眼

初眼謂

躡

躡尼輒切

屣

屣所里切謂躡著屣履也

潤二切

躡屣謂躡著屣履也

歙縣居士吳維明施費刻此

大寶積經第八十六卷

譚華沙

彌德定對

蘇寧唐士登書

盧陵彭國祥刻

聖萬壽禪寺藏

萬曆乙未仲秋徑山興聖萬壽禪寺藏

## 大寶積經卷第八十七

唐三藏法師菩提流志奉詔譯

## 大神變會第二十二之二

爾時世尊於大衆中讚商主天子善哉善哉如汝所言天子汝聞文殊師利所說神變而能了知於餘神變更無驚怖何以故一切世間大驚怖者所謂於常想中說無常想於樂想中說於苦想於我想中說無我想於淨想中說不淨想於有想中說於無想於諸見中而說空想寂靜想中說於無想於三界中說無願想於我我所說無著想若於是中不驚不怖是則

名爲住正調伏何以故若生驚怖則於是法不能受持所謂執著於我及以我所若無執著則無所住無所住則無所動無所動則無來去無來去則無所受無所受則無所取無所取則無顛倒無顛倒則無邪見無邪見則無正信無正信則無正見無正見則無正定無正定則無亂心無亂心則無住處無住處則無建立無建立則無識相無識相則無思惟無思惟則無所得無所得則無攀緣無攀緣則無分別無分別則不見自他不見自他故則無相續無相續故則無熱惱無熱惱故則無煩惱因無煩惱因故得見光明見光明故則得智慧得智慧故得廣大心得廣大心故魔不得便摧伏魔故則無障礙無障礙故則爲現前得一切佛法如是天子於一切法無生無作開示演說是則名爲說大神變爾時舍利弗白文殊師利言如我所問仁者皆以祕密說耶文殊師利言舍利弗一切諸法文字合集假名安立文字無盡隨樂積集無所見但隨樂欲如應演說而此法者無所從來亦無所去不在方不離方無集無散若以文字說一切佛法一切衆生法不從身出不從心出從因緣

生如彼文字無有積集心心所法亦無積集如心心  
所無有積集一切煩惱障礙亦無積集如煩惱障礙  
無有積集智慧亦無所積集是故煩惱智慧二俱捨  
離煩惱智慧無所住故是則名爲說大神變爾時商  
主天子白文殊師利言何等是菩薩智文殊師利言  
苦智不厭諸蘊故集智積集善根故滅智示有生故  
道智離惡道故因智所作不壞故緣智斷生死故佛  
智令人證故緣生智無所著故蘊智除蘊魔故界智  
法界平等故處智善觀空聚故施智無非時故戒智  
攝諸破戒故忍智守護衆生故精進智作善業故禪  
定智不離定心故智慧智了知諸法故方便智成熟  
衆生故慈智拔諸有故悲智無疲倦故喜智愛樂法  
故捨智成就佛法故觀察智住念處故正勤智順平  
等故神足智無作用故信根力智離一切著故精進  
根力智摧破一切煩惱故念根力智不失念故定根  
力智一切法平等故慧根力智知諸根性故菩提分  
智自然覺故道智拔諸惡趣故盡智善根無盡故無  
生智得無生忍故念佛智成就佛身故念佛智轉法  
輪故念僧智入平等衆故念捨智不捨一切衆生故  
念戒智圓滿一切願故念天智離一切惡故衆生根

智了知無量故圓滿智於戒無缺故衆生業智如實相應故處非處智不見處故十力智攝諸聲聞緣覺故無畏智了知障非障故過去世無礙智無所著故未來世無礙智一切法無所趣故現在世無礙智無所住故一切衆生受無量身智從語言生故一切衆生言音差別智從心生故一切衆生心所動智能覺了故無過失智了知一切衆生過失故無卒暴智能息一切諸鬪諍故不失念智安住亂心衆生故攝衆生智攝諸懈怠故佛不共智知應化故大方便智依般若故天子是名諸菩薩智以是智故當得如來無礙大智爾時商主天子白文殊師利言希有希有是菩薩智於三界中最爲殊勝不可以少莊嚴而能成就若能發生是智慧者爲大神變文殊師利云何菩薩能於此法具足莊嚴文殊師利言天子若聞一切衆生本來寂滅不生驚怖是名菩薩具足莊嚴天子言文殊師利云何名菩薩答言若行菩提而無所住是名菩薩又問云何名摩訶薩答曰已度諸行圓滿大智爲摩訶薩又問云何說爲殊勝衆生答曰以智慧故不著於法以方便力攝受一切是故說爲殊勝衆生又問云何名爲清淨衆生答曰不與一切煩惱

住故爲除衆生煩惱病故發大精進是名清淨衆生  
又問云何名爲極清淨衆生答言若爲度脫一切衆  
生淨修道品是名極清淨衆生又問云何菩薩爲世  
導師答曰若能安住所行之道成熟無量無邊衆生  
是名導師又問云何菩薩住於調伏答曰若於所應  
調伏衆生能令安住究竟調伏是名調伏又問云何  
菩薩而得勇猛答曰若能成熟一切衆生摧破魔怨  
令出生死是名勇猛又問云何菩薩難可沮壞答曰  
若能成滿往昔誓願不求聲聞緣覺道證是名菩薩  
難可沮壞又問云何菩薩勝出一切答曰以智方便  
護持正法成熟衆生一切天人靡不瞻仰是名勝出  
又問云何說法答曰依佛所說摧滅一切衆邪異論  
是名說法又問云何說律答曰自住於戒能斷衆生  
煩惱惡業是名說律又問云何具足利益衆生答曰  
所集善根廻向一切都是名具足利益衆生又問云何  
直心答曰於貪恚癡詭曲衆生不生恚癡又問云何  
不詣答曰所言誠實又問云何離詎答曰諦思後言  
又問云何離慢答曰於一切衆生不起貢高又問云  
何大施答曰所集難得無上菩提猶施衆生何況世  
間所有之物又問云何具戒答曰乃至失命終不捨

於菩提之心又問云何爲忍答曰能忍逼迫不逼惱  
他又問云何精進答曰簡擇諸法無少可得又問云  
何禪定答曰不見欲界又問云何智慧答曰無所分  
別又問云何住慈答曰觀衆生界空無所有云何住  
悲答曰知諸法空而不捨精進云何住喜答曰住大  
寂樂求法無厭云何住捨答曰不染世法能救世間  
云何身清淨答曰隨意生身於一切衆生平等示現  
云何語清淨答曰凡所說法終不空過悉能滿足一  
切衆生云何意清淨答曰一切衆生所有心念於一  
心中悉能了知云何天眼答曰能見一切色相光明  
而無所著云何天耳答曰聞一切聲離諸聲相云何  
他心答曰了知諸心生滅流注云何宿命答曰不動  
實際了知前際云何神通答曰不動魔業摧破諸魔  
云何調伏答曰能調一切難調伏者云何爲護答曰  
不爲諸根之所擾亂云何調順答曰一切諸法所不  
能動云何寂靜答曰處煩惱火而不爲燒度煩惱者  
而演說法云何淨信答曰若說佛身是色相法終不  
信受不爲所壞云何菩薩善巧方便答曰若見衆生  
煩惱過失等於菩提是名菩薩善巧方便說此法時  
萬二千衆生發阿耨多羅三藐三菩提心五百菩薩

得無生法忍爾時世尊讚言善哉善哉文殊師利善能演說諸菩薩行則爲已攝一切菩薩無量功德爾時商主天子白文殊師利言仁於往昔恭敬供養幾佛世尊得是辯才文殊師利言譬如幻人心數已滅天曰衆生心相尚不可得何況幻人而有心滅答曰諸佛如來性相如是我依是法供養如來天曰仁者行檀波羅蜜爲久近耶答曰如佛所化人若有問言久近行檀波羅蜜當云何答天曰無可答也文殊師利言我亦如是云何乃問久近行耶天曰汝住慳耶答言如是又問汝意云何答曰我不捨佛法及一切衆生是故爲慳天曰如文殊師利所說義者亦破戒耶答言如是天曰汝意云何答曰夫破戒者則墮惡趣我爲度脫衆生故入惡趣中故名破戒又問汝起害心耶答言如是天曰汝意云何答曰夫害心者名爲不愛我於煩惱及以二乘都無所愛故名害心又問汝懈怠耶答言如是又問汝意云何答曰我不起身口意業無所進求不取不捨故名懈怠又問汝散亂耶答言如是天曰汝意云何答曰夫散亂者非謂不住解脫心耶天曰如是答曰我爲成熟一切衆生不住解脫故名亂心又問汝無智耶答言如是又

問汝意云何答曰夫無智者同諸愚惑不怖生死豈不爾耶天曰如是答曰我於生死不驚不怖爲欲成熟愚惑衆生同其事業故名無智天曰汝爲世間堪供養者答曰我於一切生殺害心又問汝意云何答曰我殺害彼貪欲瞋癡故爲世間堪供養者天曰汝所說令諸世間悉當驚怖答言天子若實際驚怖則世間驚怖何以故一切世間卽實際故又問若復有人毀謗此說當何所至答曰當至涅槃又問以何意耶答曰聖解脫中無有文字是故毀於言說得至涅槃以是義故一切諸法本來解脫不復解脫又問是義云何答曰已解脫者寧更解脫又問謗正法者豈不入地獄耶答曰若已解脫則離諸垢云何趣地獄耶天曰文殊師利如汝所說無讚助者答曰空無相願中何所讚助又問修空行者當何所住答曰當住於慈所以者何衆生如幻自性空故天曰文殊師利云何了知諸衆生界答曰見一切衆生從因緣起不斷不常是故徧知衆生界也又問衆生界者爲何義耶答曰衆生界者卽是法界又問云何法界答曰自性空界名爲法界又問何謂空界答曰超過一切境界是虛空界又問何等是超過界答曰是佛境界

201123456789

9012345678920123456789

又問何謂佛境界答曰眼界是佛境界然佛境界非眼眼色眼識境界故耳界是佛境界然佛境界非耳聲耳識境界故乃至意界是佛境界然佛境界非意意法意識境界故色界是佛境界然佛境界非色境界故受想行識界是佛境界然佛境界非受想行識境界故無明界是佛境界然佛境界非無明界故乃至老病死界是佛境界然佛境界非老病死境界故欲界是佛境界無貪相故色界是佛境界非對除貪故無色界是佛境界非無明見故無爲界是佛境界無二相故有爲界是佛境界非三相故天子是名佛境界如是境界入一切界若邊無邊皆悉攝受菩薩善入是境界故常行世間一切境界超過魔界佛界魔界如實了知寂靜平等是則名爲最大神變復次菩薩不住平等以平等法成熟衆生云何平等及非平等一切諸法自性空寂如是了知名住平等不能入於諸法性空名非平等菩薩成熟如是衆生而亦不住空平等故一切諸法無願平等無作平等無生平等無滅平等離染平等寂靜平等無性平等滅平等涅槃平等彼不了知是平等法菩薩成熟如是衆生而亦不住於平等故是故菩薩不住平等不離

平等是菩薩行爾時商主天子白文殊師利言願爲  
我說諸菩薩行文殊師利言天子菩薩行者不可思  
議天子言云何菩薩行不可思議文殊師利言貪行  
是菩薩行貪不可思議故瞋行是菩薩行瞋不可思  
議故癡行是菩薩行癡不可思議故不慳惓是菩薩  
行無施想故不毀戒是菩薩行不取戒相故不恚害  
是菩薩行無忿相故不懈怠是菩薩行離精進念故  
不散亂是菩薩行不住定故離愚癡是菩薩行不作  
智想故無煩惱是菩薩行無所斷故無貪愛是菩薩  
行離身相故悲愍心是菩薩行捨女人慈故無染汙  
是菩薩行呵責五欲故離非法是菩薩行積集善根  
故無惱惜是菩薩行捨身命故滅諸惡是菩薩行無  
熱惱故無所著是菩薩行離愛非愛故無所壞是菩  
薩行正觀煩惱故不怖畏是菩薩行入無邊生死故  
大精進是菩薩行荷負一切衆生故不退轉是菩薩  
行成滿昔願故衆寶行是菩薩行攝三寶故一切行  
是菩薩行勤修助道法故無障礙是菩薩行離二邊  
故無過失是菩薩行智者所讚故安住心是菩薩行  
念一切衆生故無分別是菩薩行等觀一切故善丈  
夫是菩薩行荷擔無倦故勇猛是菩薩行摧破一切

90 1 2 3 4 5 6 7 8 9 201 1 2 3 4 5 6 7 8 9

煩惱故堅固是菩薩行所作不中廢故勝出是菩薩行精進不退故隨順是菩薩行於諸同侶無違逆故歡喜是菩薩行於行惡者令歡喜故信樂是菩薩行見佛聞法事師欣悅故金剛甲冑是菩薩行不毀律儀故莊嚴佛土是菩薩行淨其心故超過一切是菩薩行入最上乘故知恩報恩是菩薩行不斷佛種故智慧方便是菩薩行攝受無斷故說此菩薩行時五百菩薩得無生法忍爾時商主天子白文殊師利言快哉善說此菩薩行若諸菩薩能如是行則爲已受如來記願佛告天子如是如汝所言我昔得此行時燃燈世尊與我授記我時獲得無生法忍是名如來最大神變若久成就清淨業者乃能修習此菩薩行爾時商主天子白佛言世尊云何名無生云何當得此無生忍佛言無生者非先有生後說無生本自不生故名無生非先有起後說無起本來不起故名無起非先有相後說無相本來無相故名無相非先有作後說無作本自無作故名無作非先有衆生後說於空衆生性空故說爲空如是了知無生無滅本無所染是名無生云何爲忍如是忍可一切衆生一切刹土本來不生是名爲忍如是忍可一切聲聞

辟支佛本來不生是名爲忍如是忍可一切菩薩一切諸佛本來不生是名爲忍如是忍可一切諸法本來不生是名爲忍天子以諸法不生故刹那刹那空以刹那空故名爲無相刹那無相故色刹那刹那空那空故受想行識刹那空識刹那空故界刹那空界刹那空故處刹那空若刹那空則無所有無所有故則無所染無所染故則自性離自性離故是名一切法本來寂靜能如是忍入於平等是則名爲得無生忍受菩提記得此忍者爲無所得云何名爲有所得者見我我所二相可得名有所得見衆生壽者養育我人二相可得名有所得何謂無所得見我自性及我所性了知無二名無所得是則名爲成就於忍天子菩薩於無數劫修行此忍是名如來最大神變說此忍時三千大千世界六種震動大光徧照一切世界百千音樂不鼓自鳴於虛空中雨衆妙華四萬一千衆生皆發阿耨多羅三藐三菩提心九萬菩薩得隨順法忍以佛神力令此娑婆世界如然燈佛入蓮華城時等無有異爾時世尊卽便微笑無量百千種種色光從佛口出徧照無量無邊世界乃至梵世日月光明悉不復現繞佛三匝還從頂入爾時慧命阿

9012345678920123456789

難即從座起偏袒右肩右膝著地合掌恭敬卽於佛前而說偈言

我問光莊嚴 光明無與等 破諸煩惱闇

微笑何因緣 摧破衆魔怨 降伏諸外道

我問十力者 何緣現微笑 如來殊妙色

具三十二相 十方所尊敬 微笑何因緣

智海智慧樹 開導諸群生 功德無有邊

何緣現微笑 名稱徧三世 離垢具三明

已度三解脫 何緣現微笑 破生死醫王

足下輞輪具 金剛身不壞 微笑何因緣

誰能具此忍 誰修此淨行 志求佛功德

由是尊微笑 導師所示現 是必有因緣

善哉演梵音 令眾咸歡喜

佛告阿難我說此法門時七萬二千衆生發阿耨多羅三藐三菩提心三萬二千菩薩獲無生忍阿難汝見是商主天子不阿難白言唯然已見佛言阿難此商主天子已曾供養無數諸佛勸發無量衆生於阿耨多羅三藐三菩提阿難此商主天子過三百阿僧祇劫當得阿耨多羅三藐三菩提號功德王光明如來應正等覺明行足善逝世間解無上士調御丈夫

90 1 2 3 4 5 6 7 8 9 20 1 2 3 4 5 6 7 8 9

天人師佛世尊國名清淨劫名無垢其土皆以七寶  
所成地平如掌有八階道寶網彌覆種種莊嚴彼佛  
刹土無有聲聞辟支佛名及餘外道勒迦波利羅婆  
若迦等無諸魔事壞正法者亦無八難及諸非法苦  
惱之聲隨心所念飲食自然彼土衆生衣服玩猶  
如他化自在諸天身皆金色三十二相住阿耨多羅  
三藐三菩提是故名爲清淨世界彼功德王光明如  
來壽四十小劫彼佛法中有六十二俱胝菩薩以願  
力故隨佛涅槃阿難若有菩薩發阿耨多羅三藐三  
菩提心得如是忍一切當生清淨世界爲功德王光  
明如來授阿耨多羅三藐三菩提記爾時會中有天  
子名曰觀察以天曼陀羅花散如來上作如是言若  
功德王光明如來成無上道時我當生彼清淨世界  
爲轉輪王承事供養彼佛世尊諸菩薩衆次補佛處  
得阿耨多羅三藐三菩提佛告阿難此觀察天子當  
於彼功德王光明如來法中作轉輪王名曰善見以  
無量供具恭敬供養彼佛如來具足圓滿助菩提法  
當於彼土成阿耨多羅三藐三菩提號普光明如來  
應正等覺阿難彼善見王立其長子紹王位已於彼  
佛所出家修道彼佛世尊臨涅槃時便與授記此善

9012345678920123456789

見菩薩於我滅後次當得成阿耨多羅三藐三菩提  
佛授記已便入涅槃爾時舍利子告商主天子言如  
來已授汝菩提記天子言大德如佛所化人而與授  
記我亦如是如真如性不增不減如來授記亦無增  
減爾時世尊告阿難言如是法門汝當受持廣爲人  
說利益安樂無量衆生攝受未來諸菩薩故阿難白  
佛言世尊我已頂受當何名之云何奉持佛告阿難  
此經名爲說大神變亦名文殊師利所說密語亦名  
商主天子所問如是受持阿難若善男子善女人能  
於此經信受讀誦爲他廣說則爲已攝一切功德佛  
說此經已慧命阿難并餘比丘商主天子及無量無  
邊阿僧祇那由他諸天子等文殊師利及無量阿僧  
祇十方世界諸來集會菩薩摩訶薩衆及一切世間  
天人阿修羅等聞佛所說歡喜奉行

大寶積經卷第八十七

音釋殊師利菩薩說法

音義

沮壞

沮在呂切止過也

韻

音怪毀之也

韻

音答

韻

音答

韻

金匱居  
大寶積經  
厥寧縣廳  
萬曆乙未

王岳陞施賈刻此  
八十七卷宣府沙彌如明對

金書進賢縣萬鑑刻

徑山興聖萬壽禪寺藏

0 1 2 3 4 5 6 7 8 9 20 1 2 3 4 5 6 7 8 9

記風塵

音釋

時世名阿難言如其

大寶齋鑿參慕八十人搢受未來諸菩薩及阿難自天人阿難等聞漸次拈燈喜奉持佛告阿難自逝十丈世界請來集會告薦願度衆父一以母間臺同曾祖冊由出滿天子華文殊福味又無量功德也繇○慧命阿難托縉丸立商主天子又無量無

大寶積經卷第八十八

元魏優禪尼國王子月婆首那譯

摩訶迦葉會第二十二之一

如是我聞一時婆伽婆在舍婆提城祇樹給孤獨園與大比丘僧五千人俱菩薩摩訶薩八千人俱其名曰文殊師利菩薩觀世音菩薩大勢至菩薩德藏菩薩彌勒菩薩如是等菩薩摩訶薩而爲上首爾時世尊與百千大衆恭敬圍繞而爲說法爾時摩訶迦葉在大衆中從座而起偏袒右肩右膝著地合掌恭敬白佛言世尊我欲少問如來應正徧知若佛聽許乃

敢恣問佛告迦葉恣汝所問如來悉能爲汝分別斷汝疑心今得歡喜爾時摩訶迦葉白佛言世尊若有善男子善女人欲求涅槃於正法中出家當云何學云何行云何修觀爾時世尊告摩訶迦葉善哉善哉迦葉汝今善能問於如來如是之義如汝所問爲利一切諸天世人今得安樂汝今諦聽善思念之吾當爲汝分別解說爾時摩訶迦葉白佛言世尊如是願樂欲聞佛告迦葉善男子善女人欲求涅槃於正法中出家應學淨戒具律儀戒具正法教於清淨戒微細不犯應如是學隨順正法離諂曲心遠離貪欲具足慚愧常畏生死樂求遠離厭離生死常念涅槃若在樹下若山巖間若在靜室若在窟中初修正意念於如來應供正徧知明行足善逝世間解無上士調御丈夫天人師佛婆伽婆生具足種性具足善根具足無量淨戒無量三昧無量智慧無量解脫無量解脫知見具足一切無邊佛法不可思議具足無等無邊功德實語真語所言無二不詎衆生爲大醫王能拔毒箭爲不請友具大慈悲爲大導師說甚深法令人甚深說寂滅法令得寂滅空無衆生無相斷相無願離願無有戲論離諸戲論甚深難見難覺其性遠

離離於有無無行斷行無說離說無相平等離垢清  
淨無取無捨能滅諸苦能斷渴愛令至涅槃迦葉比  
丘如是一日若過一日在於靜室心念如來作是思  
念我得人身得出家道得比丘法親近如來不應懈  
怠所以者何於此修戒當得道果以是因緣於未來  
世若佛出世當得見佛佛出世難如優曇華迦葉比  
丘修行應學慧命須菩提之所修行迦葉如來應正  
徧知難得見聞於正法中而得出家具比丘戒甚爲  
希有善男子善女人於正法中出家者爲二事故何  
等爲一一者爲現得道果故二者爲見未來佛故迦  
葉有諸癡人受著袈裟違背如來自謂我得道果聖  
人是人若在靜室若在窟中貪心思念一切施主施  
我衣鉢作如是念如來不知我不覺我不見我迦葉  
比丘若在靜室若在窟中若行若坐若卧若念貪欲  
若念瞋恚及餘種種諸惡覺觀隨所住處其中諸神  
知彼比丘心生愁憂作如是念此諸比丘非法非宜  
於正法中得出家已思惟如是不善之法迦葉彼諸  
神等知彼比丘各作方便令不安隱迦葉彼諸天神  
以少善根得少智慧尚知他心況復如來百千萬億  
阿僧祇劫具行智慧迦葉如來無所不知無所不見

無所不覺無所不證迦葉如來具足無礙智慧於三  
世法皆悉了知是故迦葉善男子善女人於正法中  
得出家者應作是念諸佛如來悉知我心十方世界  
現在諸佛亦知我心莫於佛法作沙門賊迦葉云何  
名沙門賊沙門賊有四種何等爲四迦葉若有比丘  
整理法服似像比丘而破禁戒作不善法是名第一  
沙門之賊二者於日暮後其心思惟不善之法是名  
第二沙門之賊三者未得聖果自知凡夫爲利養故  
自稱我得阿羅漢果是名第三沙門之賊四者自讚  
毀他是名第四沙門之賊迦葉是名四種沙門之賊  
迦葉譬如有人具大勢力於閻浮提一切衆生所有  
珍寶金銀瑠璃真珠珊瑚琥珀等寶刀杖加害皆悉  
奪取迦葉於汝意云何此人得罪寧爲多不迦葉白  
佛言甚多世尊佛告迦葉若有凡夫未得聖果自知  
凡夫爲利養故自稱我得須陀洹果若受一食罪多  
於彼爾時摩訶迦葉白佛言希有世尊如來說此律  
儀之法誰聞此法未得聖果自說得道受一餓水佛  
告迦葉如是如是如汝所說若欲離生死者應如是  
行如救頭然迦葉若復有人身具大力於四天下衆  
生資身之具加以刀杖悉皆奪取迦葉於意云何彼

1 2 3 4 5 6 7 8 9 210 1 2 3 4 5 6 7 8 9 211

人以此劫奪因緣得罪多不迦葉白佛甚多世尊甚  
 多善逝佛告迦葉若凡夫人未得聖果爲利養故自  
 稱我得斯陀含果受一食施罪多於彼迦葉若復有  
 人於千世界所有衆生一切資具金銀瑠璃真珠珂  
 貝琥珀珊瑚種種諸寶無價寶衣騎乘宮殿飲食之  
 具刀杖加害悉皆劫奪迦葉於意云何彼人以是劫  
 害因緣得罪多不迦葉白佛甚多世尊甚多善逝佛  
 告迦葉若有衆生未得聖果自知凡夫爲利養故自  
 稱我得阿那含果受人信施乃至一食罪多於彼迦  
 葉若復有人身具大力於中千世界一切衆生若天  
 龍夜叉乾闥婆阿脩羅迦樓羅緊那羅摩睺羅伽人  
 非人等一切樂具刀杖加害悉皆劫奪迦葉於意云  
 何彼人以是加害因緣得罪多不迦葉白佛甚多世  
 尊甚多善逝佛告迦葉若有衆生未得聖果自知凡  
 夫爲利養故自稱我得阿羅漢果受人信施乃至一  
 食罪多於彼迦葉寧奪三千大千世界衆生一切樂  
 具不應自稱我得聖果受人信施乃至一食迦葉我  
 觀沙門法中更無有罪重於妄稱得聖果者迦葉聲  
 聞之人有四惡欲何等爲四一者求見未來世佛二  
 者求作轉輪聖王三者願生刹利大姓四者願生婆

羅門大姓是名四種惡欲若有所求乃至涅槃亦名  
惡欲是名如來祕密之說迦葉聲聞之人有四種性  
於一切時一切事所不應作何等爲四一者著我二  
者著人三者犯戒四者求未來佛法此四種性聲聞  
之人於一切時一切事所不應作迦葉若有沙門婆  
羅門持淨戒者我爲彼說阿耨多羅三藐三菩提終  
不爲彼惡欲人說爲持戒人心不諂曲求涅槃者令  
其安隱是故爲說迦葉我今更說令諸行者聞已歡  
喜迦葉若復有人以一切樂具供養四天下一切衆  
生若一劫若減一劫迦葉若復有人以一器水施於  
持戒正命之人彼善男子善女人所得功德勝前布  
施無量無邊迦葉是惡欲人若受人施傷害於人過  
於一切惡友怨敵迦葉出家之人微細煩惱復有四  
種具彼煩惱如負重擔入於地獄何等爲四一者見  
他得利心生嫉妒二者聞經禁戒而反毀犯三者違  
反佛語覆藏不悔四者自知犯戒受他信施迦葉是  
名四種微細煩惱出家之人具此煩惱如負重擔入  
於地獄迦葉有四種相似沙門何等爲四一者惡戒  
二者我見三者誹謗正法四者斷見是名四種相似  
沙門迦葉出家之人有四放逸入於地獄何等爲四

一者多聞放逸自恃多聞而生放逸二者利養放逸  
得利養故而生放逸三者親友放逸依恃親友而生  
放逸四者頭陀放逸自恃頭陀自高毀人是則名曰  
四種放逸迦葉出家之人具四放逸墮於地獄爾時  
摩訶迦葉白佛言世尊當來末世後五百歲有相似  
沙門身被袈裟毀滅如來無量阿僧祇劫所修集阿  
耨多羅三藐三菩提爾時世尊告摩訶迦葉汝莫以  
此問於如來何以故迦葉彼愚癡人實有過惡如來  
不說以惡欲故其心妄執邪行詭曲一切魔事皆悉  
信受彼愚癡人實有過惡如來不說爾時摩訶迦葉  
無有子息唯獨一身彼人去已未久之間時彼病人  
因至命終所寄財物悉皆散失彼人行還求索無所  
世尊聲聞之人亦復如是智慧微淺修行甚少又無  
伴侶不能久住在於世間若付正法不久散滅爾時  
世尊讚迦葉言善哉善哉迦葉我已了知而故付汝  
令彼癡人得聞此已生於悔心爾時摩訶迦葉白佛  
言世尊我今更欲說第二喻世尊譬如有人身力盛  
壯無諸患苦離一切病壽命無量百千萬歲生大種  
姓具足財寶善持淨戒有大慈悲內懷歡喜能捨一  
切衆生煩惱其心勇猛利益多人令得安樂利益天

1 2 3 4 5 6 7 8 9 210 1 2 3 4 5 6 7 8 9 211

人時有一人賣持寶物來至其所而語之言我有緣事當至他方以寶相寄當好守護若十年還若二十年待我來時當見相還其人得寶藏積守護彼人行還卽便歸之世尊菩薩摩訶薩亦復如是若以法寶付諸菩薩無量千億那由他劫終無失壞利益無量無邊衆生不斷佛種不斷法輪僧寶具足世尊如是之事我不能持唯有菩薩乃能堪受世尊此彌勒菩薩摩訶薩俱在此會如來付之於當來世後五百歲法欲滅時如來無量阿僧祇劫所集阿耨多羅三藐三菩提悉能守護流演廣說何以故世尊此彌勒菩薩摩訶薩於當來世當證如來阿耨多羅三藐三菩提世尊譬如國王第一太子灌頂受位當爲王事如法治世王諸群臣悉皆朝宗世尊彌勒菩薩摩訶薩亦復如是治法王位守護正法爾時世尊讚摩訶迦葉善哉善哉如汝所說爾時世尊卽伸右手猶如金色微妙光明無量阿僧祇劫善根所集其指掌色猶如蓮花以摩彌勒菩薩摩訶薩頂作如是言彌勒我付囑汝當來末世後五百歲正法滅時汝當守護佛法僧寶莫令斷絕爾時如來伸金色手摩彌勒菩薩頂時於此三千大千世界六種震動光明徧滿三

千大千世界爾時地天及虛空天上至阿迦臘吒天悉皆合掌白彌勒菩薩摩訶薩言如來以法付囑聖者惟願聖者爲利一切諸天人故受此正法爾時彌勒菩薩從座而起偏袒右肩右膝著地合掌恭敬白佛言世尊我爲利益一一衆生尚受無量億劫之苦況復如來付我正法而當不受世尊我今受持於當來世演說如來無量阿僧祇劫所修集阿耨多羅三藐三菩提彌勒菩薩說此語時三千大千世界六種震動爾時彌勒菩薩摩訶薩復白佛言世尊不應於餘衆生而起諍論及增上慢何以故世尊正事業者謂護正法世尊若聲聞辟支佛不能荷負菩薩重擔爾時世尊讚彌勒菩薩摩訶薩言善哉善哉彌勒汝今日至於我前作師子吼受持守護如來正法如是恒河沙等過去諸佛前諸大菩薩亦復如是作師子吼守護正法爾時彌勒菩薩摩訶薩白佛言世尊惟願世尊說當來世愚癡人輩自稱菩薩自稱沙門爲名利故惱亂施主知識親屬惟願世尊說其過惡何以故若世尊說其過惡我得聞已自攝心行彼愚癡人聞如來說或得信解如來知我如來覺我爾時世尊告彌勒言善哉諦聽善思念之當爲汝說彼癡

1 2 3 4 5 6 7 8 9 210 1 2 3 4 5 6 7 8 9 210

人過彌勒當來末世後五百歲有諸衆生自稱說言  
 我是菩薩彼諸惡欲我今說之彌勒具四法者自稱  
 菩薩何等爲四一者求利養二者求名聞三者詭曲  
 四者邪命彌勒具此四法是故自稱我是菩薩佛告  
 彌勒當來末世後五百歲自稱菩薩而行狗法彌勒  
 譬如有狗前至他家見後狗來心生瞋嫉嗟嘆吠之  
 內心起想謂是我家佛告彌勒當來末世後五百歲  
 亦復如是自稱菩薩行於狗法至他施主家中生已  
 家想既起此想便生貪著前至他家見後比丘瞋目  
 視之心生嫉恚而起鬭諍互相誹謗言某甲比丘有  
 如是過某甲比丘有如是過汝莫親近某甲比丘汝  
 若親近某甲比丘則爲衆人之所輕賤增長罪垢如  
 是之人心生嫉妒行餓鬼因貧賤之因爲自活故妄  
 稱已身以爲菩薩爲衣食故讚歎如來智慧功德令  
 餘衆生生於信仰內自犯戒惡欲惡行佛告彌勒汝  
 觀來世有如是等大怖畏事師子之獸應師子吼作  
 師子業非野干鳴作野干業讚歎能捨一切財物而  
 自慳惥不能離貪讚歎慈愍自行瞋恚讚歎忍辱自  
 行不忍讚歎四攝自不能行布施愛語利益同事但  
 有言語而不能學樂精進菩薩之行彌勒往昔過去

無量無邊不可稱計不可思議阿僧祇劫爾時有佛  
號曰智上如來應供正徧知明行足善逝世間解無  
上士調御丈夫天人師佛婆伽婆彌勒彼佛出於五  
濁惡世時佛法中有一菩薩比丘名樂精進具足念  
慧少欲知足順如來教遊諸村邑爲人說法國王大臣  
一切人民之所知識尊重恭敬時彼比丘欲入城  
邑先自觀察若得尊重愛語讚歎然後入城復遊邪  
見不信之處於彼不得善語供養唯得瞋恚罵詈撻  
打而彼比丘被忍辱鎧安住大悲不捨衆生亦不瞋  
恚不生悔心彌勒樂精進菩薩所化衆生悉爲比丘  
而作施主奉施衣食卧具湯藥佛告彌勒於意云何  
時彼比丘不至餘家有嫉妬不彌勒白佛不也世尊  
佛告彌勒汝觀樂精進菩薩利益之心少欲知足大  
悲觀察城邑聚落不得食處則止不入化邪見人爲  
餘比丘而作檀越更不重入化諸邪見之家令  
其正信瞋恚打罵心不瞋恨如是彌勒過去之世諸  
大菩薩入於村邑爲化衆生不爲自活彌勒莫作異  
觀爾時樂精進菩薩豈異人乎我身是也彌勒是故  
菩薩若入村邑欲化衆生當學樂精進菩薩摩訶薩  
復應學餘大菩薩行莫學狗法佛告彌勒當來末世

後五百歲有諸比丘自言菩薩爲衣食故入於聚落不爲教化衆生入於聚落唯爲財物遙相誹謗自得便喜見他得利愁憂瞋恚自求不得便生愁憂見他不得便生歡喜彌勒汝觀彼人如是顛倒爲菩薩法所有樂具應悉捨與一切衆生何以故以大悲心故發廣大願令諸衆生悉得樂故彌勒譬如長者居士唯一子顏貌端正敬順父命愛之甚重以少因緣繫在牢獄父時聞之親自入獄彌勒於汝意云何如是長者入於牢獄爲何事故彌勒菩薩白佛言世尊爲見子故入於獄中求出解脫佛告彌勒言牢獄者卽是生死長者居士喻諸菩薩言一子者如諸菩薩摩訶薩於諸衆生如一子想彌勒如彼長者居士入於牢獄爲見其子愍而救之菩薩摩訶薩亦復如是入於聚落不爲飲食衣服卧具爲化衆生令得解脫佛告彌勒當來末世後五百歲有諸比丘不修身不修心不修戒不修慧彼諸比丘入於聚落持諸香華與人作信以求衣服卧具飲食佛告彌勒比丘之法不應如是作下賤業入於村邑若入村邑應爲求法求善知識莫懷詭曲莫起憍慢應作法語莫說世事莫說田宅苦樂得失王事賊事城邑聚落軍衆之事

印 1 2 3 4 5 6 7 8 9 10 11 12 13 14 15 16 17 18 19 20 1 2 3 4 5 6 7 8 9 10 11 12 13 14 15 16 17 18 19 20

莫說男女婚會之事唯應說法讚佛功德歎說正法  
歎說聖僧說於布施持戒忍辱精進禪定智慧之法  
佛告彌勒若滿三千大千世界珍寶樂具若善男子  
善女人以此珍寶樂具施諸衆生若有善男子善女  
人爲他人說一四句偈令其得聞彼善男子善女人  
所得功德勝前功德無量無邊阿僧祇數佛告彌勒  
觀此比丘入於村邑有大利益彌勒若入城邑勿得  
遠離讚歎三寶論說世事何以故彌勒若金銀瑠璃  
真珠碼碯珊瑚諸寶及諸樂具不能令人離於生老  
病死憂悲苦惱彌勒唯有正法能大利益離於生老  
病死憂悲苦惱是名如來微密之法爾時世尊而說  
頌曰

三千大千界 珍寶滿其中 以此用布施  
所得功德少 若說一偈法 功德爲甚多  
三界諸樂具 盡持施一人 不如一偈施  
功德爲最勝 此功德勝彼 能離諸苦惱  
佛告彌勒若有菩薩摩訶薩以滿無邊世界珍寶施  
諸佛如來若有菩薩以大悲心爲一衆生說四句偈  
功德勝彼爾時世尊而說頌曰

若恒沙世界 珍寶滿其中 以施諸如來

不如一法施 施寶福雖多 不及一法施

一偈福尚勝 況多難思議

爾時世尊告彌勒菩薩言彌勒如來有光名曰一切功德莊嚴在右掌中我以此光能令三千大千世界衆生所須一切樂具悉皆充足須食與食須飲與飲須衣與衣須乘與乘須寶與寶如是等事我悉能與彌勒一切衆生雖得此樂於生死中不能解脫彌勒是故如來不施衆生世間樂具但與出世無上法寶衆生聞已畢竟離苦是故彌勒汝等悉應學於如來無上法施莫重世間資生施也彌勒當來末世後五百歲正法滅時有諸比丘自稱菩薩身作不善口作不善意作不善身犯禁戒口犯禁戒意犯禁戒造不善業無沙門果彌勒我爲發菩提心善男子善女人說菩薩善根不墮地獄畜生餓鬼及餘難處善男子善女人應勤精進具足慚愧常畏生死諸有生處常懷怖畏我當云何令諸三界六道衆生速得解脫何以故彌勒菩薩摩訶薩發願許度三界六道一切衆生令得解脫不安隱者令得安隱未涅槃者令得涅槃彌勒我觀一切世界若天若人若魔若梵若沙門婆羅門中不見一人有能荷負如是重擔如菩薩者

經

卷六十八

三

如八

彌勒譬如有人頂戴三千大千世界山河石壁有人告言善男子汝今以此三千大千世界頂戴一劫若減一劫若百千劫頂戴不息彌勒於汝意云何如是之人爲大力不彌勒白佛言世尊甚天世尊甚大善逝佛告彌勒菩薩摩訶薩精進之力復勝於彼菩薩發願許度一切衆生皆令得住涅槃之樂彌勒譬如有人於三千大千世界一切衆生所有作業彼人一時悉能成就彌勒於汝意云何此人所作事業寧爲大不彌勒白佛甚大世尊佛告彌勒菩薩所作事業復過於此菩薩發言三界衆生受苦惱者我令解脫彌勒譬如長者唯有一子容顏端正年在幼稚孝順父母長者及子妻妾眷屬奴婢財物悉入王獄爾時大王語長者言去此一百由旬有城名某汝去七日令至彼城復行七日還至我所汝能如是捨汝妻子眷屬財物悉皆還汝及賜官物若過七日從於彼城不至此者當斷汝命及汝一子親屬財物悉入於官佛告彌勒於意云何如是長者勉力勤進爲愛自身爲愛一子爲惜妻妾奴婢財物而從彼城勤苦至此彌勒菩薩白佛言世尊如我解佛所說義者彼人不念飲食睡眠唯念速行何以故世尊如是之人自惜

命故是故速行佛告彌勒若一切衆生勤行精進悉如彼人一切衆生如是精進欲比菩薩精進百分不及一千分不及一百千分不及一億分不及一百千億分不及一百千億那由他乃至不可數分不及一何以故彌勒一切衆生順生死流菩薩逆生死流令其住於不動涅槃彌勒譬如有人勇猛大力轉勝於前取四大海及諸河水悉還置於阿耨大池彌勒於意云何是人所作爲希有不彌勒菩薩精進難作希有如是之事甚爲希有佛告彌勒菩薩精進難作希有復過於此菩薩以大悲心化一切衆生令住阿耨多羅三藐三菩提是事爲難若能信有佛法及僧此事爲難若有能信善惡業果此事爲難貪瞋癡起能令滅者是事爲難能捨親屬發少欲心而求出家行至七步此事爲難身披袈裟於正法中正信出家離於欲火此事爲難不犯禁戒此事爲難能離憍慢修遠離行此事爲難信諸法空此事爲難於深法中得柔順忍此事爲難證三解脱門此事爲難證須陀洹果乃至阿羅漢果此事亦難何以故彌勒所謂難者於正法中以信出家得沙門果彌勒當來末世後五百歲有諸衆生發菩薩心於正法中出家學道空無所

得捨苦薩業作凡愚行彌勒何等是苦薩業彌勒菩薩業者有二十法若有苦薩不成就此二十法者則不能得坐於道場何等二十法一者離慳心二者修布施三者離熱惱四者修淨五者離瞋恚六者修忍辱七者離懈怠八者大精進九者離亂心十者念慧修無依定十一者修甚深忍十二者具足般若波羅蜜十三者行無相行十四者行空行十五者行無願行十六者成無願境界十七者不捨一切衆生十八者修行大悲十九者不念聲聞緣覺之乘二十者心樂成就如來智慧是名苦薩摩訶薩二十種業苦薩成就此二十業能坐道場彌勒菩薩摩訶薩有四種畢定誓何等爲四一者畢定成佛轉於法輪二者生死衆生令得解脫三者令無量衆生住阿耨多羅三藐三菩提四者捨自身樂令諸衆生得無漏樂是名四種畢定之誓佛告彌勒譬如二人善解醫方善解呪術善別毒藥善識甘露爾時一人於大衆中卽取毒藥而自食之現希有相食已受苦身不安隱復求甘露呪術望除毒氣爾時彼人求不能得毒氣熾盛遂便命終時第二人作如是言我今不能食於毒藥不食毒藥不須甘露不欲處衆作希有想令身苦

印 1 2 3 4 5 6 7 8 9 10 11 12 13 14 15 16 17 18 19 20

惱彌勒當來末世後五百歲有諸在家出家菩薩亦復如是作如是言如我說法能除諸罪如是語已轉集惡業復作是言我還懺悔我說彼人於正法中名爲死人何故名死謂於正法墮落退沒是名爲死彌勒復有菩薩其心清淨作如是言我不作罪不須懺悔我當懺悔過去未來一切諸罪現在不作亦如彼人不食毒藥不須甘露彌勒所言毒者於正法中犯於戒律是名爲毒彌勒汝等莫作食毒之人佛告彌勒復有四法能令菩薩離薩婆若離聲聞果況薩婆若何等爲四一者不知恩二者詣曲三者妄語四者犯戒彌勒此四種法能令菩薩離薩婆若亦離聲聞況薩婆若彌勒復有四法菩薩應急走捨離過百由旬何等爲一者利養二者惡友三者惡衆四者同在一處或作戲笑或瞋或鬪當速捨離過百由旬菩薩於餘菩薩不應惡心彌勒若有菩薩打罵割截三千大千世界一切衆生得罪多不彌勒菩薩白佛言世尊打一衆生得罪尚多何況三千大千世界一切衆生何以故世尊一切菩薩於衆生不應起於瞋恚之心爾時世尊告彌勒言若有菩薩打罵割截三千大

印 1 2 3 4 5 6 7 8 9 210 1 2 3 4 5 6 7 8 9 210

千世界一切衆生得罪尚少若有菩薩於餘菩薩起  
瞋恚心退於菩提復爾所劫彌勒譬如木柱若以草  
土不能斬截必以利斧乃能斬之菩薩善根亦復如  
是餘不能盡若於菩薩起瞋恚心能滅諸善彌勒是  
故菩薩應學恭敬於初發心諸菩薩等心生尊重如  
世尊想爾時彌勒菩薩摩訶薩白佛言世尊我當修  
行尊重恭敬一切衆生何況菩薩何以故世尊應捨  
瞋恚行於忍辱離於諂曲行清淨心遠離有爲行於  
無我無取之行不貴財寶當重法行不求衣食當求  
法財捨離嫉妬見人巨富心助歡喜非唯求名以爲  
沙門當學沙門一切功德我非口說當修實行捨於  
利養少欲知足求佛功德不爲財利入於聚落念薩  
婆若入於聚落不爲衣食入於村邑行諂曲行當行  
正行讚四聖種不學凡夫下劣之心當學佛行不觀  
他過但自調伏修奢摩他毗婆舍那離三業惡常修  
三業清淨之行離於破戒當學波羅提木叉不依佛  
法僧而自活命讚歎如來真實功德不爲求施爲求  
法故常讚正法修如法行讚歎聖僧依不退僧不依  
世間有爲之僧不求一切世間資身之具唯求正法  
不求世事求出世法離於諂曲行真實行不樂一處

當如野鹿無所依止離世間樂求佛功德當離睡眠  
初夜後夜讀誦經典捨於憒鬧當行遠離於諸功德  
不生厭想求諸功德心不暫息當離狗法當行師子  
所吼之法爲究竟友不應暫友捨無反復當行報恩  
不以財利而作親友當以淨心而作親友捨虛誑心  
行真實行捨下劣法當求成就無上佛身於如來所  
當行恭敬不起惰慢捨於兩舌心口相違當行誠實  
無二之言不作菩薩而行詭曲當以淨心行奢摩他  
毗婆舍那捨於我慢當行恭敬離不淨食當淨持戒  
食人之施當捨邪念念諸佛法離於人見行於空行  
離於妄覺行無相行離身詭曲當行三業清淨之行  
不求財利而演說法以大悲心而說正法不以財物  
而作親友以法親友不爲自利爲利他人令不損害  
行阿蘭若離於詭曲不作詭曲而行乞食不行詭曲  
著糞掃衣所以者何具十二頭陀者不求一切世間  
利養爾時世尊讚彌勒菩薩摩訶薩言善哉善哉彌  
勒汝求佛功德心無厭足作師子吼已於過去佛所  
種諸善根能說此法說此功德爾時彌勒菩薩摩訶  
薩說此法時衆中五百比丘從座起去爾時摩訶迦  
葉問諸比丘今聽說法汝等比丘欲詣何所諸比丘

1 2 3 4 5 6 7 8 9 210 1 2 3 4 5 6 7 8 9 210

言大德迦葉如彌勒菩薩摩訶薩所說之法甚深難得我等作如是念我等不能修得此法欲還歸俗何以故信施之食難可消故爾時文殊師利菩薩讚諸比丘善哉善哉善男子是汝所應若不能消信施之食寧可一日百數歸俗不應破戒受人信施爾時文殊師利白佛言世尊何等之人應受信施爾時世尊告文殊師利菩薩善男子若有修禪解脫者我聽彼人受信施食爾時文殊師利告五百比丘汝等今者應速修行佛世難值當住佛法爾時五百比丘問文殊師利言文殊師利我等云何修行文殊師利告諸比丘言汝等應如是觀無一法合無一法散無一法生無一法滅不受一法不捨一法不增一法不減一法若如是行於法無得無得則無去無去故無來無來則無住比丘是名無來無去無住無不住爾時文殊師利說是法時五百比丘於諸漏中心得解脫

大寶積經卷第八十八

校譌

第一紙

十一行敢恣之  
恣宋南藏作諾

第十三紙

十行失比  
藏作天

第十

音釋

七紙

十五行念  
宋藏作恩

印

1

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52 53 54 55 56 57 58 59 60 61 62 63 64 65 66 67 68 69 70 71 72 73 74 75 76 77 78 79 80 81 82 83 84 85 86 87 88 89 90 91 92 93 94 95 96 97 98 99 100

過打

過織瓜切打音

哩嚙

哩五佳切嚙士

罵詈

罵言

利正斥曰罵

薩婆若

梵語也此云一  
切智若爾者切

比丘寶量

休寧施節室

程氏男仕

孫階共刻

大寶積經第八十八卷

豫章沙彌可震對

厥寧唐仕鑒書

上元陶夢桂刻

萬曆乙未仲秋徑山興聖萬壽禪寺識

# 大寶積經卷第八十九

元魏優禪尼國王子月婆首那譯

## 摩訶迦葉會第二十三之二

爾時摩訶迦葉白佛言世尊當來末世後五百歲何等菩薩行於詔曲爾時世尊告迦葉言迦葉多有衆人行於詔曲親近惡友少讀誦經爲求衣食爾時摩訶迦葉白佛言善哉世尊唯願世尊利益多人說彼詔曲不勤修行菩薩之過令彼菩薩聞此過已自攝心行令得清淨爾時世尊告摩訶迦葉言迦葉當來末世後五百歲有諸菩薩親近惡友少讀誦經唯作

供養舍利之業以香花瓔珞旛蓋燈明供養如來舍利塔廟迦葉我爲在家無智衆生今種善根說供養舍利彼諸癡人不解我意但作此業迦葉我於一切天人之中常說此法修奢摩他毗婆舍那以自調伏世間當有信樂婆羅門居士供養舍利迦葉彼諸癡人捨於讀誦修禪智慧供養舍利因之活命迦葉若有菩薩以滿三千大千世界上至梵天香花燈明一燈炷如須彌山以如是等供養如來若有菩薩淨心持戒於師尊所受持讀誦一四句偈淨心修行乃至七步功德勝彼無量無邊迦葉若有菩薩以滿三千大千世界花香末香於百千蠱晝夜六時供養如來若有菩薩捨於憒鬧深畏三界爲利衆生發心趣向阿蘭若處舉足七步勝前功德無量無邊迦葉於意云何如來化衆生故作是說耶迦葉莫作此見如來實說所以者何如來現見明了知故佛告迦葉過去無量無邊不可思議無數阿僧祇劫爾時有佛號妙華如來應供正徧知明行足善逝世間解無上士調御丈夫天人師佛婆伽婆其劫亦名妙華迦葉妙華如來有九十六億百千聲聞大衆爾時有轉輪聖王名曰尼彌如法治世主四天下迦葉時尼彌大王

千子具足勇健威猛迦葉爾時大王具千子已復有  
 二子結跏趺坐忽然化生一名達摩二名善法迦葉  
 爾時大王請妙華如來及比丘僧滿八萬四千歲供  
 養衣服卧具飲食湯藥捨諸家事唯修供養七日之  
 後一切比丘各施新衣種種飲食隨心所樂廣造精  
 舍隨心樂住一一比丘給使七人施百味食迦葉爾  
 時大王造立精舍方八十由旬彩畫微妙出過世間  
 妙華如來及比丘僧坐彼精舍從於地下出衆妙華  
 令彼精舍華至於膝迦葉爾時大王於不思議功德  
 精舍供養妙華如來滿八萬四千歲恭敬供養尊重  
 讚歎迦葉爾時大王供養如來滿八萬四千歲已最  
 後一日妙華如來飯食之後達摩善法二子眷屬及  
 諸四衆至妙華如來正徧知所頭面作禮白佛言世  
 尊頗有布施功德善根勝此尼彌大王功德善根者  
 不迦葉時二王子禮如來時大千世界悉皆震動迦  
 葉爾時妙華如來侍者弟子名通達法從座而起頂  
 禮佛足白佛言世尊何因緣故大地震動以何因緣  
 此二王子禮佛而住爾時妙華如來告通達法善男  
 子何用此問若佛如來說此王子淨心深忍大悲之  
 心禮如來足一切天人皆當迷沒迦葉爾時妙華如

來告一聲聞神足弟子那羅延言善男子汝示神力  
起二童子迦葉爾時那羅延比丘從座而起卽以右  
手捉一童子復以左手捉一童子欲扶令起而不能  
動時那羅延盡大神通扶二童子欲令其起而不能  
彼如分一毛爲千萬分不動一分迦葉爾時三千大  
千世界地皆震動山河石壁悉亦大動而不能動彼  
二童子迦葉爾時那羅延以妙華如來威神力故令  
於下方恒河沙等諸佛世界悉皆震動而亦不動彼  
二童子毛之一分迦葉爾時那羅延比丘禮妙華佛  
白言世尊我將不失神通力耶何以故世尊此二童  
子生來未久在於佛前頭面著地我盡神力不能令  
起爾時妙華如來告那羅延比丘言善男子汝不失  
通善男子菩薩境界不可思議一切聲聞緣覺所不  
能動不能思量善男子若滿三千大千世界一切衆  
生具大神力如汝不異至於億劫不能動此二童子  
起迦葉爾時妙華如來說此語時衆中四百二十萬  
衆生發阿耨多羅三藐三菩提心彼諸衆生作如是  
念菩薩神力甚爲希有未得一切智神力乃爾大聲  
聞神力不能令動況成佛道是故我等應行菩薩道  
願證如來無上智慧迦葉爾時四百二十萬衆生作

是念已於無上菩提心得堅住迦葉爾時彼衆有一菩薩名曰善慧在大衆中從座而起偏袒右肩頂禮佛足白妙華如來言世尊唯願世尊起二童子如彼所問願佛解說佛告迦葉爾時妙華如來從虛空中出大音聲其聲徧滿乃至十方恒河沙等諸佛世界聲至之處世界地皆六種震動放大光明徧照十方迦葉時二童子聞此聲已從地而起迦葉童子起時於此三千大千世界人天妓樂不鼓自鳴於虛空中雨衆妙華迦葉時二童子從地起已至如來所右繞三匝頂禮佛足合掌恭敬瞻仰如來迦葉爾時妙華如來告善慧菩薩言善男子此二童子禮我足已作如是問世尊頗有布施福德善根勝此尼彌大王功德善根者此二童子禮我足已發問而住迦葉爾時善慧菩薩白妙華如來言世尊願佛解說二童子問令諸天人得安樂故爾時妙華如來告善慧菩薩善男子汝今諦聽當爲汝說善男子尼彌國王所作功德若有菩薩住阿蘭若行遠離行少知諸法得無生忍功德勝彼無量無邊善男子若三千大千世界一切衆生一一衆生所作功德如尼彌王如是三千大千世界一切衆生所有福德不如菩薩修行遠離住

於淨心正念相應解諸法空無來無去如是少忍功德勝前功德百分不及一千分不及一億分不及一百億分不及一千億分不及一百千億分不及一千那由他億分不及一乃至算數不及其一善男子如恒河沙等一切世界所有衆生一一衆生悉作福德如尼彌王彼諸衆生所作福德至恒河沙劫常修福德善男子於意云何彼善男子得福多不迦葉爾時善慧菩薩白妙華如來言希有世尊如來說喻不可思議如此善根不可思議迦葉爾時妙華如來告善慧菩薩善男子我今告汝有智慧人成就深忍能信此語彼一切衆生所集善根不如此二童子以淨心故禮如來足勝前一切衆生善根百分不及一千分不及一千百分不及一億分不及一百億分不及一千億分不及一千千億分不及一百千億分不及一百千億那由他分不及一乃至算數譬喻所不能及迦葉爾時妙華如來大衆之中八萬四千比丘同聲發言世尊我等隨喜彼人功德成就深法忍信諸法空心樂遠離趣阿蘭若舉足七步發阿耨多羅三藐三菩提心成就智慧我等隨喜迦葉爾時妙華如來讚諸比丘善哉善哉諸善男子汝等以此隨喜之業不思議善根當

作恒河沙等轉輪聖王然後得成阿耨多羅三藐三  
菩提爾時摩訶迦葉及諸大眾一時同聲白佛言世  
尊我等隨喜彼人發心成就深忍信諸法空遠離寂  
滅自性清淨爾時世尊告摩訶迦葉言迦葉爾時達  
摩善法二童子白妙華如來言世尊菩薩具何等法  
施不望報不生嫉妬心不慳惄不生貪著見人行施  
心不希望成就如來無上之行得深法忍成無上智  
迦葉爾時妙華如來告達摩善法二童子言善男子  
菩薩具足四法施不望報不嫉妬不慳惄不生貪見  
人施不希望成就如來無上之行得甚深忍見無上  
智何等爲四一者信諸法空二者遠離三者深忍四  
者正念善男子菩薩具此四法施不望報心不嫉妬  
不慳惄不生貪見人施不希望成就如來無上之行  
成就深忍具無上智善男子復有四法若菩薩具此  
四法施不望報心不嫉妬不慳惄不生貪見人施不  
希望成就如來無上之行成就深忍滿無上智何等  
爲四善男子菩薩求多聞得多聞已遊於城邑聚落  
說法無所希望乃至不受一言善讚心無所貪諸佛  
所說一切施中法施第一住第一施其心歡喜不求  
世間財物布施何以故善男子十方無數阿僧祇諸

佛世界諸佛如來及比丘僧不少世間資生之具若有菩薩住清淨戒修於正法具大悲心不求利養一切諸佛之所憶念若有能說一四句偈說偈文字皆自性空一切諸法亦復如是皆自性空此善男子善根功德勝前善根百分不及一千分不及一百千分不及一億分不及一百億分不及一千億分不及一百千億分不及一千那由他億分不及一乃至阿僧祇分亦不及一迦葉爾時妙華如來告二童子善男子菩薩具足四法得成如來無上之行何等爲四一者行無上處二者說無上法三者施無上物四者信無上法善男子是名四法菩薩成就此四法者得成如來無上之行迦葉時妙華如來爲二童子說是法時彼二童子聞此法已踊在空中高七多羅樹同聲讚佛

如來知諸行 教衆生行施 而不著於施  
此施無上施 能成無上忍 此中無有我  
衆生命及人 希有大精進 演說如是法  
成就甚深忍 及得無上行 得無上菩提  
永滅諸欲惱 大智慧清淨 更不受後有  
說於遠離行 令住阿蘭若 修於空解脫

亦不生分別 常勤行布施 不生於分別  
此是無垢際 遠離諸名字 說清淨尸羅  
令行寂滅處 此是第一戒 覺知寂滅處  
常修行於忍 不分別衆生 此是清淨忍  
離一切分別 修堅固精進 離一切有爲  
佛說此精進 能成遠離法 焚燒一切事  
斷於諸有無 此無分別禪 不起諸煩惱  
非此亦非彼 中間亦不住 此第一智慧  
遠離於三世 修習寂滅想 復觀於此想  
此想何處生 是故知無想 讚歎佛功德  
演說第一法 其心不異念 聽受於正法  
說名字無盡 自性體不成 觀境界無實  
其心則解脫 若起如是想 我爲說法者  
彼則被魔縛 不知於法相 若欲得菩提  
及求聲聞者 求緣覺菩提 當修學此法  
說於一解脫 智慧無邊量 勿作下劣願  
當願上菩提 若求如是身 相好自莊嚴  
如佛金色身 當求上菩提 作生一切法  
作者不可得 諸法從緣生 無自性自性  
迦葉時二童子在虛空中說此偈時尼彌大王從城

而出及諸地神虛空諸神皆悉來集爾時衆中八萬四千衆生發阿耨多羅三藐三菩提心阿僧祇衆生種於善根迦葉爾時達摩善法二童子等從空中下詣妙華如來所白言世尊我等歸依佛歸依法歸依僧發阿耨多羅三藐三菩提心以比丘形行菩薩道世尊真發心者信一切法無生世尊真發心者不著諸法何以故世尊若有著則法不生是故世尊說離著心得彼無生世尊此無生亦不應說是無生何以故有言說者則有生滅若具淨智則無生滅無生滅處是畢竟盡是故世尊以平等際發阿耨多羅三藐三菩提心不念於法亦無法得亦無不得如是得平等無得平等何以故一切諸法本性淨故迦葉爾時妙華如來爲二童子說此法時衆中十千衆生得無生法忍尼彌大王并及千子五千大臣悉發阿耨多羅三藐三菩提心佛告迦葉爾時妙華如來飯食既訖澡洗鉢已於大衆中告大王言尼彌大王我今說法王及大衆聞佛說法踊躍歡喜迦葉爾時達摩善法二童子聞佛說法以淨信心離於欲火欲求出家從城而出來至佛所至佛所已而說頌曰

一切諸如來 讀歎出家法 在家多垢穢

壞滅白淨法 增長不善法 毀滅於善法  
在家多過失 出家離染汙 設使百億劫  
受欲無厭足 在家如死滅 受欲無厭足  
如海受衆流 而無有點足 凡夫亦如是  
受欲無厭足 如火燒乾草 而無厭足時  
凡夫亦如是 受欲無厭足 貪欲網所縛  
滅壞於世間 是故應離縛 爲發出家故  
在家具衆過 不得無上道 出家修遠離  
爾乃得菩提 過去諸如來 已入於涅槃  
住阿蘭若法 獲得大菩提 是故學諸佛  
趣向阿蘭若 捨愛離居家 然後得安隱  
一切三千界 珍寶滿其中 以此珍寶聚  
在家施諸佛 若以無惱心 知於在家過  
學諸佛如來 出家求智慧 旣求出家已  
遠離諸欲火 舉足行七步 勝以三千施  
三千之功德 不如此一分 是故出家者  
如來之所讚 成就大智慧 遠離諸繫縛  
離一切諸著 乃證無上道 速住寂靜處  
斷除諸欲愛 一切毒熾心 悉滅無有餘  
學諸佛如來 如實知諸法 速遠離在家

1 2 3 4 5 6 7 8 9 10 11 12 13 14 15 16 17 18 19 20

卷之九

二

三

四

五

六

住阿蘭若法 若欲求佛道 修於遠離行

應學阿蘭若 不應樂在家 此是諸佛境

聖人所住處 能住此道者 則能得菩提

欲等惱衆生 若求遠離者 應離在家法

修習阿蘭若 欲證甘露法 轉無上法輪

摧伏諸魔怨 當習阿蘭若

迦葉爾時達摩善法二童子說此頌已從城而出往  
詣妙華如來所住之處到已頭面禮足右繞三匝白  
言世尊我等今者於如來所欲求出家唯願世尊哀  
愍聽許令得出家迦葉爾時妙華如來知二童子信  
心清淨求出家法是時如來卽聽出家住比丘法迦  
葉爾時大王聞二童子得出家已卽以太子令紹王  
位王與九百九十九子八萬四千夫人五千大臣及  
諸人民以淨信心離於欲火捨家出家一切俱往詣  
妙華佛到已頂禮佛足白妙華佛言世尊我等欲求  
出家願佛聽許令得出家迦葉時妙華佛知諸大眾  
心信清淨悉聽出家住比丘法迦葉爾時大王第一  
太子登位七日內自思惟我終不捨薩婆若心何用  
如是王位寶財爲欲所縛我終不捨無上菩提作是  
念已發心出家於十五日遊四天下說此偈言

1 2 3 4 5 6 7 8 9 10 11 12 13 14 15 16 17 18 19 20

我父及親屬 皆悉已出家 無量億衆生  
爲法亦出家 我今樂出家 不樂住五欲  
一心求出家 欲詣導師所 若發心出家  
離諸欲火者 應速隨我去 離難甚難得  
不發出家心 不遠離欲火 安心在居家  
安住於實法

迦葉時彼太子說此偈時四天下中無一衆生樂在家者皆悉發心願求出家迦葉時妙華如來知諸衆生心信清淨求出家已妙華如來於四天下一切城邑村落悉作化佛及比丘僧迦葉時四天下一切衆生無有一人住在家者以淨信心離於欲火悉得出家彼諸衆生旣出家已不須種植其地自然生諸梗米諸樹自然生諸衣服一切諸天供侍給使迦葉爾時達摩善法二比丘勇猛精進於其六十三億歲中不坐不卧但勤精進求薩婆若念薩婆若於六十三億歲勤精進已得遍至三昧所坐之地名金剛處其地皆是金剛所成十方一切諸佛說法悉聞受持聞已復能爲他解說迦葉時四天下一切衆生若有修學聲聞乘者無一衆生凡身命終極懈怠者得阿那含從此命終生淨居天共彼同行求緣覺者從此命

1 2 3 4 5 6 7 8 9 210

終當生他方無佛之處生大種姓諸根具足以過去世善根力故離於欲火而行出家七日之後成緣覺道利益無量無邊衆生入般涅槃菩薩乘者成就五通具四無量無礙辯才得陀羅尼迦葉莫作異念爾時尼彌大王豈異人乎則我身是時太子者今彌勒菩薩是迦葉莫作異見何以故達摩童子今文殊師利是善法童子者虛空藏菩薩是迦葉汝觀彼佛國土清淨如是善根衆生之所住處爾時摩訶迦葉白佛言世尊妙華如來壽命幾時佛告迦葉妙華如來壽命八劫迦葉妙華如來般涅槃後正法住世滿足一劫一切諸天供養舍利無在家衆迦葉時二比丘少欲知足不供舍利不禮佛塔迦葉爾時諸天新學比丘百千大衆各相謂言此二比丘邪見不信於佛舍利不興供養不禮佛塔迦葉爾時諸天及諸比丘百千大衆說此語時達摩善法二比丘問衆人言於汝意云何云何供養是真供養如來以何事故如來舍利而得供養諸比丘言修戒定智慧解脫解脫知見故舍利得供養二比丘言修戒定慧解脫解脫知見是真供養非供舍利諸比丘言如是如是如汝所言云何戒相禪定智慧解脫解脫知見復何等相達

摩善法二比丘言無作相是戒相乃至解脫知見無作相是知見相迦葉時二比丘語衆人言於意云何無作能供養無作不諸比丘言不也達摩善法二比丘言真供養者無佛想無見佛何況供養若供養佛當供養自身諸比丘言云何供養自身二比丘言應如如來應正徧知供養自身一切衆生之所供養如佛所學應如是學護持禁戒集諸善法思惟諸法莫取法相若能如是自供養者當得天人之所供養若欲供養佛舍利者當自供養如佛如來具諸功德舍利得供養若能成就如是功德名供養佛不起想相名供養佛若多若少不生分別名供養佛非後世去非今世來非此岸非彼岸非常非斷非取非捨是則名曰供養如來非增非減非生非滅非盡非不盡是則名曰供養如來非心非心數法非憶想非我非取非受非諍論非不諍論非毀非讚非二非入是則名曰供養如來亦非有爲亦非無爲是則名曰供養如來身無所作口無所作意無所作於身口意求不得是則名曰供養如來無過去想未來現在想不可得無依無著無所求想亦不分別是則名曰供養如來無佛想無法想無僧想無人無自無他想是則名

1 2 3 4 5 6 7 8 9 10 11 12 13 14 15 16 17 18 19 20

曰供養如來真如來身名無生相不可以生而修供  
 養真如來身名無作相不以作相而修供養真如來  
 身名無二相不應二相而修供養真如來身名無漏  
 相不以有漏而修供養真如來身名曰空相不以身  
 見命見斷見常見我見我所見有見無見供養如來  
 真如來身名無相相不可以相而修供養真如來身  
 名無願相不可以願而修供養真如來身名無有相  
 不可以有而修供養真如來身名不動相不可動相  
 而修供養真如來身名無行相不可以行而修供養  
 真如來身名離貪相不可以貪而修供養真如來身  
 名離瞋相不可以瞋而修供養真如來身名離癡相  
 不可以癡而修供養真如來身具戒定慧解脫解脫  
 知見不可以破戒亂心愚癡而修供養真如來身慈  
 悲喜捨不可以瞋心惱心妬心散心而修供養真如  
 來身具布施持戒忍辱精進禪定智慧不可以慳破  
 戒瞋恚懈怠亂癡而修供養迦葉達摩善法於大眾  
 中說此法時四百二十萬衆生得無生法忍八萬四  
 千衆生得清淨智阿那含果二百二十萬衆生發阿  
 補多羅三藐三菩提心迦葉汝觀達摩善法二比丘  
 等如是淨心迦葉汝應學彼正士甚深之忍及巧方

便迦葉彼二比丘於大衆中說此法時諸比丘聞此  
法已皆住深忍悉行少欲知足之行不供養舍利及  
佛塔廟何以故彼諸比丘悉樂深法迦葉彼七日後  
一切佛塔悉皆隱沒及諸舍利所在器中亦悉隱沒  
迦葉汝應如是學彼正士甚深之忍佛告迦葉當知  
末世後五百歲有諸菩薩及諸比丘不修身不修心  
不修戒不修慧爲活命故供養佛塔及佛舍利不爲  
涅槃不爲離欲而修供養自犯禁戒愚癡無智如來  
舍利具戒定慧解脫解脫知見之所熏修爲活命故  
供養尊重具貪瞋癡於佛如來應正徧知離貪瞋癡  
所有舍利爲活命故而興供養自身具足慳貪嫉妬  
瞋恚懈怠亂心愚癡若大施主正住一心爲活命故  
化令供養如來舍利迦葉我爲教化初始發心諸善  
男子善女人等以神通方留此舍利令供養者受人  
天樂爲未來因乃至涅槃彼愚癡人於我法中雖得出  
家不解我法捨出家行而但供養塔廟舍利爲自  
活故爲得衣鉢爲利養故爲名聞故爲此事故供養  
舍利何等名爲比丘之業迦葉如上所說沙門之業  
則有二種一者修禪二者背誦如是說者爲入道故  
非究竟說迦葉若有作業能盡業者名沙門業無作

無誦無禪無作無無作無念無不念無盡無生證三  
脫門不住三界無來無去是沙門業彼衆生等離斯  
正業更習餘業彼福業者爲化在家人如是在家順  
如來教當得阿那含果彼愚人輩於我法中而行出  
家尚不行隨順之法況復能得若有得者無有是  
處迦葉於當來世後五百歲有相似沙門衣服形貌  
似像沙門戒不相似定不相似慧不相似迦葉譬喻  
有人善知醫方及諸呪術卽以呪術呪一袈裟與人  
令著彼見生貪卽便著之若至七日若至八日其身  
熾然猶如火聚如彼呪已取之與人彼人見已便生  
貪著比丘亦爾見好衣服受取而著若至七日若至  
八日若在舍內若在巷中若在林中彼所著衣熾然  
如火燒人善根迦葉於汝意云何彼著袈裟有利益  
不迦葉白佛言世尊無所益也佛告迦葉如是如是  
我袈裟者戒定智慧解脫解脫知見無量阿僧祇善  
根所集迦葉於當來世有愚癡人著聖人衣似像沙  
門入於村邑中有信心婆羅門長者居士見被法服  
謂爲沙門皆共尊重供養讚歎彼愚癡人因袈裟故  
而得供養便生歡喜身壞命終墮於地獄生地獄已  
大熱鐵鎣以爲衣服吞噉鐵丸飲洋沸鐵坐熱鐵牀

迦葉汝觀袈裟威德如是彼愚癡人著於袈裟受樂放逸自作惡業身壞命終墮於地獄迦葉我常說言寧以燒熱鐵鎧爲衣不以破戒之身而著袈裟寧吞熱鐵不以破戒之身食人信施迦葉汝觀破戒之人食他信施有如是過是故汝等應當修學清淨戒法迦葉於汝意云何若天若龍若夜叉若乾闥婆若阿修羅若迦樓羅若緊那羅若摩睺羅伽若人若非人能作如來色身像不迦葉白佛言不也世尊如來色像不可思議無色像故是故此等皆不能作佛告迦葉於當來世後五百歲有諸比丘不修身不修心不修戒不修慧若於毱上牆壁之下造如來像因之自活以此業故自高慢人爾時摩訶迦葉白佛言世尊波斯匿王造如來像得福多不佛言迦葉得福甚多波斯匿王造如來像施無價衣不求衣服飯食之報迦葉彼愚癡人爲活命故造立形像迦葉若賣畜生猶尚不善況彼癡人作如來像於白衣前而銜賣之以自活命迦葉譬如有人幼小無知捨棄甘露而飲毒藥迦葉彼愚癡人亦復如是造如來像爲資生故而便賣之是名爲毒迦葉所言毒者於正法中貪是其毒迦葉彼愚癡人以貪心故而起瞋恚遯相鬪諍

1 2 3 4 5 6 7 8 9 10 11 12 13 14 15 16 17 18 19 20

互相誹謗各言我行供養因彼諍論墮於地獄迦葉譬如有人無巧方便入敵戰時所持刀劍而反自傷迦葉愚癡之人亦復如是無方便故因於法故而墮地獄迦葉若有善男子善女人以七寶造如來塔莊嚴成就一一寶塔高廣嚴好如須彌山徧滿恒沙諸佛世界譬如甘蔗竹葦迦葉於汝意云何彼善男子善女人得福多不迦葉白佛言世尊造如來像如四指者得福無量況復造像如須彌山所得功德不可思量佛告迦葉若有菩薩內觀佛身得深法忍功德勝彼無量無邊迦葉若復有人住於淨戒以四句偈爲他人說解其義趣所得福德無量無邊迦葉云何觀於如來之身迦葉若菩薩欲觀如來者當學大精進菩薩迦葉乃往古昔無數阿僧祇劫有佛世尊號曰光明如來應供正徧知明行足善逝世間解無上士可化丈夫調御師天人師佛婆伽婆迦葉光明如來般涅槃後有一菩薩名大精進婆羅門種端正無比迦葉光明如來正法之中有諸比丘少欲知足住如法行迦葉彼諸比丘皆悉造立如來形像爾時有一比丘於白氍毹上畫如來像衆彩莊嚴悉皆具足持至大精進菩薩所爾時大精進菩薩見此畫像心大

歡喜作如是言如來形像妙好乃爾況復如來正徧  
知身願我來世得成如是妙色之身爾時大精進菩  
薩作如是念我今不能住在居家若在家者不能成  
就如是之身迦葉爾時大精進菩薩年始十六諸根  
具足至父母所頭面敬禮白父母言我今欲於如來  
正法出家學道願爲隨喜父母答言莫作是說何以  
故我今年老唯汝一子汝若出家我等當死大精進  
言我當方便令父母存我得出家父母問言欲作何  
業子白父母我從今日不食諸味不昇牀坐不食酥  
油不飲漿水若善若惡口不言說乃至得出家迦葉  
大精進菩薩如是誓已嘿然而住如是嘿然一日不  
食爾時父母誦諸呪術持百味食而授與之亦不肯  
食亦不言說迦葉大精進菩薩如是嘿然過第二日  
爾時父母與母知識五百人等持百味食來至其所  
誦諸呪術望其食設尚不顧視況復食之迦葉時大  
精進於第三日父親五百持種種食勸之令食亦復  
如是嘿然不語不飲不食亦不顧視於第四日五百  
同友持百味食誦諸呪術令從已志時大精進嘿然  
而住於第五日爾時父母悉出寶藏金銀瑠璃種種  
寶物及諸姝女八萬四千上妙嚴飾將至其所父親

母親及其同友各五百人勸大精進作如是言汝當  
在家以此財寶布施自恣作福與諸姝女共相娛樂  
時大精進於大衆中嘿然而住曾不瞻眄於第六日  
斷諸憶想不起食念但念如來應正徧知迦葉爾時  
父母及其知識八萬四千諸妙姝女同時悲泣禮大  
精進時大精進亦不顧視迦葉爾時大精進菩薩所  
住之處有一宅神於虛空中現大神力而說頌曰  
精進心堅固 難動如須彌 不捨出家心  
爲得菩提故 大地可傾動 火可在水居  
如是等可轉 菩薩不可動 汝等莫勤苦  
而作不善業 衆生無慧眼 久遠處生死  
爲利諸羣生 是故求菩提 其心樂出離  
必成無上道 不爲世間報 而行菩薩道  
願成大覺智 救濟苦衆生 三千大千界  
珍寶滿其中 及諸上妙土 其心不貪著  
汝等愚癡心 所作不善業 汝當自悔過  
菩薩不處俗

迦葉時大精進菩薩父母眷屬知識及諸姝女聞天  
神語悉皆悔過告菩薩言隨意出家汝當飲食勿令  
殞絕迦葉時大精進不食七日光明暉悅顏色不變

經

大智度論卷之二十一

三

妙力

唯心憶念正徧知身一切諸天散華供養時大精進  
 過七日已捨諸家業如棄涕唾爾時父母同友知識  
 及諸姝女八萬四千皆悉悲泣隨而送之爾時大精  
 進菩薩持畫疊像入於深山寂靜無人禽獸之間開  
 現畫像取草爲座在畫像前結跏趺坐正身正念觀  
 於如來諦觀察已作如是念如來如是希有微妙畫  
 像尚爾端嚴微妙況復如來正徧知身復作是念云  
 何觀佛爾時林神知彼菩薩心之所念白菩薩言善  
 男子汝如是念云何觀佛若欲觀佛當觀畫像觀此  
 畫像不異如來是名觀佛如是觀者名爲善觀時大  
 精進作如是念我今云何觀此畫像與如來等復作  
 是念如來像者但有名字一切諸法亦復如是非覺  
 非知如是像者但有名字一切諸法亦復如是非覺  
 名字如是名字自性空寂無所有如來之身其相如  
 是如此畫像非證非得非果非證者非得者非得果  
 者非住者非去非來非生非滅非垢非淨非色非非  
 色非貪盡非瞋盡非癡盡非陰界入非初非中非後  
 一切諸法亦復如是如來身相亦復如是如此畫像  
 非覺非作一切諸法亦復如是如來身相亦復如是  
 如此畫像非見非聞非聽非嘗非觸非知非出息非

1 2 3 4 5 6 7 8 9 10 11 12 13 14 15 16 17 18 19 20

入息一切諸法亦復如是無有知者如此畫像非欲界攝非色無色界攝一切諸法亦復如是如此畫像非初非中非後非此非彼非行非非行非取非捨非作非誦非實非虛非生死非涅槃一切諸法亦復如是如來身相亦復如是菩薩如是觀如來身結跏趺坐經於日夜成就五通具四無量得無礙辯得普光三昧具大光明成就天眼過於人眼以此天眼見於東方阿僧祇佛得淨天耳諸佛世尊所說之法悉能聽受天耳淨故一一諸佛所說之法聽聞受持不相障礙迦葉時大精進勤行精進滿足七日以智爲食不食世供一切諸天散華供養迦葉時大精進不被袈裟亦不見佛不受禁戒心但憶念學薩婆若迦葉菩薩應如是觀如來身非觀非非觀迦葉菩薩應如是觀如來畫像如大精進菩薩摩訶薩觀如來像如是觀已成大智慧以此智慧悉見十方阿僧祇佛聞佛說法迦葉爾時大精進菩薩從山而出來至村落爲人說法一會說法二萬衆生住阿耨多羅三藐三菩提無量阿僧祇衆生住於聲聞緣覺功德父母親屬皆住不退阿耨多羅三藐三菩提迦葉莫作異念爾時大精進菩薩摩訶薩者豈異人乎我身是也迦

印 1 2 3 4 5 6 7 8 9 20 1 2 3 4 5 6 7 8 9

葉是故菩薩摩訶薩應學大精進菩薩摩訶薩亦應學餘諸大菩薩迦葉當來末世後五百歲有求菩薩諸善男子無方便心多諸貪著於牆壁下畫如來像而求利養彼作是說我獨供養人無供養以修少善自高慢人因此供養以自活命迦葉彼時衆生不修三昧不誦正典但作此業因此業故於施主邊獲得衣服飲食卧具湯藥以自活命迦葉汝觀彼破戒苦薩住不淨戒自稱多聞迦葉彼破戒人不誦經典供養形像因而自活爾時摩訶迦葉白佛言世尊希有世尊希有善逝世尊廣說愚癡凡夫詔曲之失世尊若有善男子善女人聞如是說何有不住清淨之戒世尊願於未來此法久住令彼善男子善女人聞已慚愧如來知我如來覺我所作邪法永令休息爾時世尊告摩訶迦葉如來所說爲善男子聞我此法修行離惡我爲此人說如是法爾時世尊說此經已摩訶迦葉彌帝隸菩薩文殊師利童子一切世間天人阿脩羅乾闥婆等聞佛所說皆大歡喜

大寶積經卷第八十九

校譌

第十五紙

十一行名無生相宋  
南藏作無生無相

音釋

鐵牒

牒音  
華

銜賣

銜獎  
切

瞻眄

美辭  
切

斜視

休寧居士程可銓	杭州沈友文	桐鄉孫光
韜男世楨世杰	婦范氏孫奎郎	同邑姚克
賓男閏孫一孫忠	孫懋孫曉余助	馮穰
廿寧資積經第八十九卷	乾共施貴刻此	餘杭
固寧唐士登書	南昌沙彌德定對	
萬曆乙未孟秋徑山興聖萬壽禪寺識		

# 大寶積經卷第九十

唐三藏法師菩提流志奉詔譯

## 優波離會第二十四

如是我聞一時佛在舍衛國祇樹給孤獨園與大比丘衆千二百五十人俱菩薩摩訶薩五十萬人爾時世尊如龍象王顧視觀察告諸菩薩摩訶薩言善男子汝等誰能於後末世護持正法攝受如來百千萬億那由他阿僧祇劫所集阿耨多羅三藐三菩提法安住祕密種種方便成熟衆生爾時彌勒菩薩卽從座起偏袒右肩右膝著地合掌白言世尊我能堪任

於後世時護持如來百千萬億那由他阿僧祇劫所  
集阿耨多羅三藐三菩提法師子慧菩薩曰我堪  
任安住祕密種種方便成熟衆生無盡意菩薩曰我  
能堪任以廣大願度脫無盡諸衆生界跋陀羅菩薩  
曰我堪任令諸衆生得聞我名皆悉成熟無空過  
者妙德菩薩曰我堪任於諸衆生隨所願求悉令  
滿足無畏菩薩曰我堪任攝受無邊世界衆生而  
作饒益金剛菩薩曰我堪任於惡趣中度諸衆生  
令得解脫除障菩薩曰我堪任解脫衆生煩惱繫  
縛智幢菩薩曰我堪任滅除衆生無明闇蔽法幢  
菩薩曰我堪任常行法施度脫衆生日幢菩薩曰  
我堪任恒以安樂成熟衆生月幢菩薩曰我堪任  
以諸功德成熟衆生善眼菩薩曰我堪任與諸  
衆生自性安樂觀自在菩薩曰我堪任於諸惡趣  
拔濟衆生得大勢菩薩曰我堪任度諸惡趣未度  
衆生普賢菩薩曰我堪任令諸衆生憶念過去經  
歷受苦便得解脫善數菩薩曰我堪任調伏一切  
難調衆生妙意菩薩曰我堪任樂小法者度令成  
熟善順菩薩曰我堪任成熟下劣少智衆生光積  
菩薩曰我堪任拔濟墮於畜生趣者令得解脫不

思議菩薩曰我能堪任愍令成熟餓鬼衆生令得解脫大威力菩薩曰我能堪任爲諸衆生閉惡趣門無諍論菩薩曰我能堪任爲諸衆生示解脫道賢吉祥菩薩曰我能堪任究竟斷除衆生苦惱月光菩薩曰我能堪任與諸衆生畢竟安樂日光菩薩曰我能堪任於諸衆生未純熟者令得成熟無垢菩薩曰我能堪任令諸衆生所有志樂皆得圓滿斷疑菩薩曰我能堪任度脫一切下劣衆生無畏菩薩曰我能堪任攝受衆生稱讚利益慧勝菩薩曰我能堪任隨順種種勝解衆生皆得成熟光明菩薩曰我能堪任恒以正勤拔濟衆生無量菩薩曰我能堪任爲諸衆生於一切法示無爲道無畏菩薩曰我能堪任隨諸衆生種種志樂皆能示現寶勝菩薩曰我能堪任示諸衆生妙珍寶聚妙慧菩薩曰我能堪任令諸衆生見者歡喜皆得成就寶藏菩薩曰我能堪任度脫衆生離諸障礙寶賢菩薩曰我能堪任令諸衆生自識宿命皆得成就寶手菩薩曰我能堪任以諸珍寶惠施衆生令得安樂勝意菩薩曰我能堪任令諸衆生永離貧窮喜見菩薩曰我能堪任施諸衆生一切樂具金剛菩薩曰我能堪任爲諸衆生開示正道福相菩薩

曰我能堪任悅可衆心令得度脫法超菩薩曰我  
能堪任淨除衆垢而演說法無垢菩薩曰我能堪任愛  
護衆生悉令成熟法現菩薩曰我能堪任常以正法  
度脫衆生空寂菩薩曰我能堪任令諸衆生滅煩惱  
壽月勝菩薩曰我能堪任爲諸衆生示法方所師子  
意菩薩曰我能堪任常以法施利益衆生童子光菩  
薩曰我能堪任從卑下處拔出衆生覺吉祥菩薩曰  
我能堪任開示正道閉惡趣門金光菩薩曰我能堪  
任示現身相成熟衆生吉祥菩薩曰我能堪任與諸  
衆生常作利益持世菩薩曰我能堪任爲諸衆生閉  
地獄門甘露菩薩曰我能堪任令諸衆生越度生死  
網明童子曰我能堪任於後末世爲諸衆生示現光  
明滅除煩惱爾時舍利弗聞諸菩薩作如是等勇猛  
弘誓成熟衆生歎未曾有白佛言希有世尊此諸菩  
薩摩訶薩不可思議具足大悲方便善巧勇猛精進  
而自莊嚴一切衆生無能測量不可沮壞所有光明  
無能障蔽世尊我當稱讚是諸菩薩未曾有事所謂  
堪任有來求索頭目耳鼻身體手足一切諸物無所  
憐惜世尊我常思惟若有人能逼迫如是諸菩薩等  
從其求索若內若外一切財物心無怯弱當知皆是

不可思議解脫菩薩佛言舍利弗如是如是如汝所  
言是諸菩薩智慧方便三昧境界一切聲聞及辟支  
佛所不能知舍利弗此諸菩薩摩訶薩能現諸佛神  
通變化滿足衆生諸所欲樂而於諸法心無所動若  
有衆生樂爲居士憍慢放逸菩薩爾時爲成熟故現  
大居士威德之身而爲說法若有衆生恃大勢力而  
自憍慢菩薩爾時爲調伏故現那羅延大力之身而  
爲說法若有衆生志求涅槃菩薩爾時爲度脫故現  
聲聞身而爲說法若有衆生樂觀緣起菩薩爾時爲  
度脫故現緣覺身而爲說法若有衆生志求菩提菩  
薩爾時爲度脫故卽現佛身令入佛智如是舍利弗  
是諸菩薩種種方便成就衆生悉令安住於佛法中  
所以者何唯有如來智慧解脫究竟涅槃更無餘乘  
而得度脫以是義故名爲如來如來如實覺了如故  
故名如來知諸衆生種種欲樂悉能示現故名如來  
成就一切善法根本斷於一切不善根本故名如來  
能示衆生解脫之道故名如來能令衆生遠離邪道  
住於正道故名如來演說諸法真實空義故名如來  
舍利弗菩薩如是知諸衆生種種志樂隨應說法令  
得解脫爲諸愚夫開示實智不動法界能現種種幻

化莊嚴令諸衆生次第當得趣涅槃岸復次舍利弗  
在家菩薩住於慈愍不惱害心應修二施何者爲二  
一者法施二者財施出家菩薩應修四施何等爲四  
一者筆施二者墨施三者經本施四者說法施無生  
法忍菩薩應住三施何等爲三所謂王位布施妻子  
布施頭目支分悉皆布施如是施者名爲大施名極  
妙施舍利弗白佛言世尊是諸菩薩於貪瞋癡不怖  
畏耶佛言舍利弗一切菩薩有二犯戒何等爲二一  
者瞋相應犯二者癡相應犯如是二犯名大破戒舍  
利弗因貪犯者爲過微細難可捨離因瞋犯者爲過  
者何貪結能爲諸有種子生死蔓延連持不絕以是  
義故微細難斷因瞋犯者墮於惡趣可速除斷因癡  
犯者當墮八種大地獄中難可解脫復次舍利弗若  
有菩薩犯波羅夷者應對清淨十比丘前以質直心  
殷重懺悔犯僧殘者對五淨僧殷重懺悔若爲女人  
染心所觸及因相顧而生愛著應對一二清淨僧前  
殷重懺悔舍利弗若諸菩薩成就五無間罪犯波羅  
夷或犯僧殘戒犯塔犯僧及犯餘罪菩薩應當於三  
十五佛前晝夜獨處殷重懺悔應自稱云我某甲歸

依佛歸依法歸依僧

南無釋迦牟尼佛

南無金剛不壞佛

南無寶光佛

南無龍尊王佛

南無精進軍佛

南無精進喜佛

南無寶火佛

南無現無愚佛

南無寶月佛

南無無垢佛

南無離垢佛

南無勇施佛

南無清淨佛

南無娑留那佛

南無水天佛

南無堅德佛

南無栴檀功德佛

印 1 2 3 4 5 6 7 8 9 20 1 2 3 4 5 6 7 8 9 20

南無量掬光佛

南無光德佛

南無無憂德佛

南無那羅延佛

南無功德華佛

南無蓮華光遊戲神通佛

南無財功德佛

南無德念佛

南無善名稱功德佛

南無紅炎帝幢王佛

南無善遊步功德佛

南無闍戰勝佛

南無善遊步佛

南無周匝莊嚴功德佛

南無寶華遊步佛

南無寶蓮華善住娑羅樹王佛

如是等一切世界諸佛世尊常住在世是諸世尊當  
慈念我若我此生若我前生從無始生死已來所作  
衆罪若自作若教他作見作隨喜若塔若僧若四方  
僧物若自取若教他取見取隨喜五無間罪若自作

1 2 3 4 5 6 7 8 9 20123456789

若教他作見作隨喜十不善道若自作若教他作見作隨喜所作罪障或有覆藏或不覆藏應墮地獄餓鬼畜生諸餘惡趣邊地下賤及彌戾車如是等處所作罪障今皆懺悔今諸佛世尊當證知我當憶念我復於諸佛世尊前作如是言若我此生若於餘生曾行布施或守淨戒乃至施與畜生一搏之食或修淨行所有善根成就衆生所有善根修行菩提所有善根及無上智所有善根一切合集校計籌量皆悉迴向阿耨多羅三藐三菩提如過去未來現在諸佛所作迴向我亦如是迴向

衆罪皆懺悔 諸福盡隨喜 及諸佛功德

願成無上智 去來現在佛 於衆生最勝

無量功德海 我今歸命禮

如是舍利弗菩薩應當一心觀此三十五佛而爲上首復應頂禮一切如來應作如是清淨懺悔菩薩若能滅除此罪爾時諸佛卽現其身爲度一切諸衆生種種樂欲悉令圓滿皆得解脫復次舍利弗菩薩若入大悲三昧則能示現地獄畜生閻魔羅界成熟衆生菩薩若入大莊嚴三昧則能示現長者之身成

熟衆生若入殊勝三昧則能示現轉輪王身成熟衆  
生若入熾然威光三昧則能示現帝釋梵王殊妙色  
身成熟衆生菩薩若入一向三昧則能示現聲聞之  
身成熟衆生菩薩若入清淨三昧則能示現辟支佛  
慧衆生菩薩如是入一切法自在三昧隨其志  
樂現種種身成熟衆生或現帝釋身或現梵王身或  
現轉輪聖王身皆爲成熟諸衆生故而於法界亦無  
所動何以故菩薩雖復隨順衆生種種示現不見身  
相及衆生相無所得故舍利弗於意云何如師子王  
大哮吼時諸小野干能堪任不舍利弗言不也世尊  
又舍利弗如大香象其所負重驢堪任不不也世尊  
又如帝釋及梵天王威德自在貧賤之人能堪任不  
不也世尊又如大力金翅鳥王翹翔運動諸餘小鳥  
能堪任不不也世尊佛言舍利弗是諸菩薩所有善  
根勇猛之力依出離智淨諸罪垢遠離憂悔得見諸  
佛及得三昧亦復如是如斯罪障非諸凡夫聲聞緣  
覺所能除滅菩薩若能稱彼佛名晝夜常行是三種  
法能滅諸罪遠離憂悔得諸三昧爾時優波離從禪  
定起往詣佛所頂禮佛足右達三帀却住一面白佛

言世尊我於靜處獨坐思惟作如是念世尊所說波羅提木叉清淨戒學爲聲聞緣覺菩薩乘者作是說言寧捨身命終不捨戒世尊若佛在世若滅度後云何名爲聲聞緣覺波羅提木叉云何名爲菩薩乘者波羅提木叉世尊說我於持律中最爲第一我當云何能了毗尼善巧之義若我從佛親聞受持逮無所畏然後乃能爲他廣說今此大衆諸來菩薩及比丘僧悉皆集會善哉世尊惟願廣說決定毗尼斷除疑悔爾時世尊告優波離汝今當知聲聞菩薩學清淨戒所發心所修行異優波離有聲聞乘持清淨戒於菩薩乘名大破戒有菩薩乘持清淨戒於聲聞乘名大破戒云何名爲聲聞乘人雖持淨戒於菩薩乘名大破戒優波離聲聞乘人乃至不應起於一念更受後身是名聲聞持清淨戒然於菩薩名大破戒云何菩薩持清淨戒於聲聞乘名大破戒菩薩摩訶薩修行大乘能於無量阿僧祇劫堪忍受身不生厭患是名菩薩持清淨戒於聲聞乘名大破戒以是義故爲菩薩乘說不盡護戒爲聲聞乘說盡護戒爲諸菩薩說開遮戒爲諸聲聞說唯遮戒爲菩薩乘說深心戒爲聲聞乘說次第戒云何菩薩持不盡護戒聲聞乘

者持盡護戒菩薩乘人雖持淨戒於諸衆生應當隨順聲聞乘人不應隨順是故菩薩持不盡護戒聲聞乘人持盡護戒云何名爲菩薩持開遮戒聲聞乘人持唯遮戒若諸菩薩於大乘中發趣修行日初分時有所犯戒於日中分不離一切智心如是菩薩戒身不壞若日中分有所犯戒於日後分不離一切智心如是菩薩戒身不壞若日後分有所犯戒於夜初分不離一切智心如是菩薩戒身不壞若夜初分有所犯戒於夜中分不離一切智心如是菩薩戒身不壞若夜中分有所犯戒於夜後分不離一切智心如是菩薩戒身不壞若夜後分有所犯戒於日初分不離一切智心如是菩薩戒身不壞以是義故菩薩乘人持開遮戒設有所犯不應失念妄生憂悔自惱其心於聲聞乘有所犯者便爲破壞聲聞淨戒何以故聲聞持戒斷除煩惱如救頭然所有志樂但求涅槃以是義故名聲聞乘持唯遮戒復次優波離云何菩薩持深入戒聲聞乘人持次第戒菩薩乘人於恒沙劫受五欲樂遊戲自在未曾捨離菩提之心如是菩薩不名失戒所以者何菩薩善能守護安住菩提之心乃至夢中一切結使不爲其患而是菩薩所有煩惱

漸漸當盡不應一生便盡諸結聲聞乘者成熟善根  
如救頭然乃至一念不喜受生以是義故大乘之人  
持深入戒說有開遮名不盡護聲聞乘人持次第戒  
名曰唯遮名爲盡護何以故優波離求大乘者於阿  
耨多羅三藐三菩提甚爲難得具大莊嚴乃能成就  
是故菩薩雖於無量阿僧祇劫往來生死終不生於  
獸離之心以是義故如來觀察爲大乘人不應一向  
說獸離法不應一向說於速證涅槃之法應當爲說  
慈喜相應甚深微妙無染之法遠離憂悔無繫著法  
無障無礙性空之法菩薩聞已於生死中而無獸倦  
決定圓滿無上菩提爾時優波離白佛言世尊若有  
菩薩貪心相應而犯於戒或有菩薩瞋心相應而犯  
於戒或有菩薩癡心相應而犯於戒世尊如是菩薩  
於三犯中何者爲重爾時世尊告優波離言若諸菩  
薩修行大乘如恒沙劫貪心相應而犯戒者其罪尚  
輕若一瞋心而犯於戒其罪甚重何以故因貪犯戒  
攝受衆生因瞋犯戒棄捨衆生優波離所有諸結能  
捨衆生菩薩於此不應生畏所有諸結能捨衆生菩  
薩於此應生怖畏優波離如佛所說貪欲難捨爲過  
微細瞋恚易捨爲過麤重癡難捨離過復麤重優波

離於煩惱中若難捨離小犯之罪是諸菩薩應當堪  
忍若易捨離大犯之罪如是煩惱乃至夢中不應忍  
受以是義故大乘之人因貪犯戒我說是人不名爲  
犯因瞋犯戒爲大犯戒名大過患名大墮落於佛法  
中是大留難優波離若諸菩薩於毗尼中無善方便  
貪相應犯便生怖畏瞋相應犯不生怖畏若諸菩薩  
於毗尼中有善方便貪相應犯不生怖畏瞋相應犯  
生大怖畏爾時文殊師利法王子在大衆中白佛言  
世尊一切諸法畢竟毗尼何所調伏佛告文殊師利  
若諸凡夫了知諸法究竟毗尼如來終不說於調伏  
以不知故如來爲令覺了諸法畢竟毗尼漸次爲說  
諸毗尼法爾時優波離白佛言世尊如來說此決定  
毗尼文殊師利於是法中未有所說善哉世尊願令  
文殊師利爲少解說佛告文殊師利汝今當說究竟  
毗尼善巧之義是優波離願樂欲聞爾時文殊師利  
法王子語優波離言一切諸法畢竟寂滅心寂滅故  
名究竟毗尼一切諸法我不可得無染著故名不悔  
毗尼一切諸法本性清淨無顛倒故名最勝毗尼一  
切諸法如如實際離諸見故名清淨毗尼一切諸法  
不來不去無分別故名不思議毗尼一切諸法無住

無著念念滅故名淨諸趣毗尼一切諸法住虛空際  
離諸相故名自性遠離毗尼一切諸法無去來全不  
可得故名三世平等毗尼一切諸法不可安立心平  
等故名永斷疑惑毗尼優波離是名法界究竟毗尼  
諸佛世尊依此成道若善男子於是法中不善觀察  
則爲遠離如來淨戒時優波離白佛言世尊文殊師  
利所說諸法不可思議爾時世尊告優波離言文殊  
師利所說之法依不可思議無礙解脫以是義故凡  
所說法離諸心相謂心解脫增上慢人令得離於增  
上慢故優波離白佛言世尊云何聲聞及菩薩乘增  
上慢者佛告優波離若有比丘作是思惟我斷貪欲  
名增上慢我斷瞋恚及以愚癡名增上慢貪欲法異  
諸佛法異名增上慢瞋恚法異諸佛法異名增上慢  
愚癡法異諸佛法異名增上慢謂有所得名增上慢  
謂有所證名增上慢謂有解脫名增上慢見諸法空  
名增上慢見於無相名增上慢見於無願名增上慢  
見於無生名增上慢見無所作名增上慢見有諸法  
名增上慢見法無常名增上慢謂諸法空何用修習  
爲菩薩乘人增上慢者若諸菩薩作是思惟我當發

1 2 3 4 5 6 7 8 9 10 11 12 13 14 15 16 17 18 19 20

心求一切智名增上慢我當修行六波羅蜜名增上慢唯依般若波羅蜜而得解脫更無餘法而得出離名增上慢此法甚深此非甚深名增上慢此法是淨此法非淨名增上慢此諸佛法此緣覺法此聲聞法名增上慢此法應作此不應作名增上慢此是深法此非深法名增上慢此是近法此非近法名增上慢此是正道此是邪道名增上慢我於阿耨多羅三藐三菩提爲疾得耶不疾得耶名增上慢一切諸法不可思議無能知者我能了知名增上慢乃至於不可思議阿耨多羅三藐三菩提而起思惟爲大執著是名菩薩增上慢者爾時優波離白佛言世尊云何比丘離增上慢佛告優波離若於一切不思議法無所執著是名究竟無增上慢爾時世尊欲重宣此義而說偈言

一切戲論從心起 不應分別法非法  
如是見法不思議 彼人處世常安樂  
凡夫迷惑隨心轉 多劫輪迴諸有中  
若知法性皆無性 是名真實不思議  
若有比丘念諸佛 非善思惟非正念  
於佛妄生分別想 而此分別無真實

若有思惟於空法 如是凡夫住邪道  
但以文字說於空 文字與空何可得  
若有思惟寂靜法 是心非有本無生  
心行覺觀皆戲論 無念名爲見諸法  
一切諸法無思念 有心有念盡皆空  
若人愛樂觀察空 於此無念勿生念  
法同草木無知覺 若離於心不可得  
衆生自性無所有 一切諸法皆如是  
如因日光眼能見 夜則緣離無所覩  
若眼自能見色者 何故待緣方能了

眼常因彼諸光明 能見種種青黃色  
當知見性依衆緣 是故知眼不能見  
設有聞諸悅意聲 是故知眼不能見  
推其去處不可得 以分別故生聲想  
一切諸法但言聲 文字於中假安立  
是聲無有法非法 凡愚不知妄生著  
我爲世間歡布施 而施根本不可得  
無所說中而演說 是故佛法不思議  
我常歡說持淨戒 亦無衆生破戒者  
破戒之性猶虛空 清淨持戒亦如是

我說忍辱爲最勝 無見無生爲忍性  
實無少法可瞋者 由是說名殊勝忍  
我說晝夜常精進 寢寐恒覺爲無上  
雖經多劫勤修行 然於所作無增減  
禪定解脫及三昧 開示世間如實門  
法性本來無所動 隨順假說諸禪定  
觀察覺了名智慧 了知諸法名智人  
諸法自性無所有 亦無觀察了知者  
我常歎說修苦行 愛樂頭陀寂靜法  
能知諸法不可得 是名清淨知足人

我說地獄諸苦事 死入大怖惡道中  
無量衆生起厭心 實無惡趣可來往  
刀杖鉢稍衆苦具 亦無有能造作者  
由分別故而見有 無量楚毒迫其身  
園林種種妙華敷 宮殿衆寶相輝映  
亦無有人能作者 皆從分別妄心生  
虛偽之法詭世間 凡夫繫著生顛倒  
猶如分別諸幻焰 於此取捨悉皆空  
我說發趣菩提心 利益世間最殊勝  
而實菩提不可得 亦無發趣菩提者

心性清淨常光明 真實無僞無塵染  
凡夫分別生貪著 而彼煩惱本來空  
諸法自性常寂靜 何有貪欲及瞋癡  
不見生貪離欲處 爾乃名爲得涅槃  
了知諸法如虛空 常處世間無所畏  
其心未曾生染著 由是成就大菩提  
於無數劫修衆行 度脫無量諸衆生  
譬如世間大幻師 實無衆生可度者  
衆生自性不可得 化作無邊千億衆  
還復害此諸化人 於此幻化無增損

一切衆生如幻化 求其邊際不可得  
若知如是無邊性 斯人處世無疲厭  
了知諸法如實相 於諸欲中實無染  
大悲利益諸衆生 調伏衆生言離欲  
不見衆生而利益 而實無人無壽者  
如以空拳誘小兒 當知此事甚爲難  
開手拳空無所見 小兒於此復號啼  
如是諸佛難思議 善巧調伏衆生類  
了知法性無所有 假名安立示世間

以大慈悲勸說言 於我法中最安樂  
汝應出家捨恩愛 當得沙門殊勝果  
既已出家勤修習 如所修行得涅槃  
復觀諸法如實相 實無諸果而可得  
果無所有而得證  
快哉大悲人師子  
一切諸法如虛空  
或說名爲禪解脫  
而此根力本無生  
無色無形不可取  
我說修行有所證  
若謂於中有所得  
諸法自性無所有  
所說得證爲無得  
衆生得果名殊勝  
譬如良田無種子  
如是衆生不可得  
一切衆生性寂滅  
若能了知如是法  
當知遠離一切相  
是則非證沙門果  
當於何處言得證  
如是了知乃名得  
我說衆生本不生  
於中終不有芽生  
當於何所而言證  
無有得其根本者  
斯人滅度永無餘

印

1 2 3 4 5 6 7 8 9 210 1 2 3 4 5 6 7 8 9 211

過去無數百千佛 無有能度衆生者

若此衆生真實有 畢竟無能得涅槃

一切諸法皆寂滅 未曾有法可生者

若能如是見諸法

彼人已出於三界

是則無礙佛菩提 於中究竟無所有

若能了知如是法 我說名爲離欲人

爾時世尊說此偈已二百比丘增上慢者諸漏永盡  
心得解脫六萬菩薩得無生忍爾時優波離白佛言  
世尊當何名此經我等云何奉持佛告優波離此經  
名爲決定毗尼亦名摧滅心識汝應受持佛說此經

已尊者優波離諸比丘衆文殊師利并諸菩薩摩訶  
薩及一切世間天人阿脩羅等聞佛所說皆大歡喜  
信受奉行

### 大寶積經卷第九十

#### 音釋

蔓蓮

蔓音萬蓮音延蔓  
蓮相連屬不斷也

掬

菊

彌戾車

梵語也亦云

蔑戾車此云

云

云

惡見

見孺民卑

初戾

力霽切

波羅提木義

梵語也此云解脫又律

云

云

云

云

云

云

戒是正順之本故

名波羅提木義

稍

鉢

鉢莫侯切鈎兵也長二丈八者

謂之

印

1

2

3

4

5

6

7

8

9

20

1

2

3

4

卷之二

金壇孫雲翼真

常熟錢順化男世淳共施刻

大寶積經第九十卷秀水比丘釋洪智對

晚寧唐士登書進賢翁正福刻

萬曆乙未仲秋徑山興聖萬壽禪寺識



二  
十八

0 1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220 1 2 3 4 5 6 7 8 9 230 1 2 3 4 5 6 7 8 9 240 1 2 3 4 5 6 7 8 9 250 1 2 3 4 5 6 7 8 9 260 1 2 3 4 5 6 7 8 9 270 1 2 3 4 5 6 7 8 9 280 1 2 3 4 5 6 7 8 9 290 1 2 3 4 5 6 7 8 9 300